

AWIG-AWIG

DESA PAKRAMAN SENGKIDU



PERBEKELAN SENGKIDU
KECAMATAN MANGGIS
KABUPATEN KARANGASEM

MURDDHA WAKYA

Om Swastyastu

Om Awighnamastu Namo Sidham

Purwa pangastungkaran tityang Krama Desa Pakraman Sengkidu, ring buk padan Ida Sanghyang Widhi maka sangkanparaning dumadi, bhatara-bhatari sane malingga ring Pura Puseh Sengkidu, minakadi pura kahyangan sami sane wenten sajroning wawengkon Desa Pakraman Sengkidu, dwaning malarapan saking kretta waranugrahan paduka Bhatara Samudhaya, karya puniki kasidhan puput.

Kaping kalih hatur angayubagyan tityang Krama Desa Pakraman Sengkidu, pingajeng ring ida dane para panglingsir, kelihan, pamangku, minakadi ida dane sane maraga cestakara, widagdha pradnya wicaksana sareng sami, sane sampun sangkaning sweca ledang sareng mapawangun ncripta uger-uger marupa awig-awig Desa Pakraman Sengkidu puniki, pacang kanggen sepat siku-siku sajroning desa kantos kahungkur wekas.

Taler majeng ring Pemerintah Daerah Kabupaten Karangasem, para manggala sane mastika ngiwang patutang awig-awig, tityang ngaturang pangayubagya, dwaning sampun kasidhan nureksa maritetes saha mastika, kantos marupa puput.

Munggwing daging ipun manut Tri Hita Karana, indik kahyangan genah ngadisthana Ida Sanghyang Parama Wisesa, indik pawongan pinaka krama dessa, indik palemahan pinaka wawidangan wawengkon desa, mabantang antuk lekita sastra-gama, sasana, paswara, dresta, minakadi sane sawosan, sane hanut ring pamargin dharma agama kalih dharma nagara.

Dumadak kasidhan mamangguhang kajagaddhitam sakala niskala.

Om Shantih Shanti Shantih Om.

PRALAMBANG
DESA PAKRAMAN SENGKIDU



ARTOS PRALAMBANG DESA PAKRAMAN SENGKIDU

1. Meru, pinaka lambang “ngarumaketang” sinoman makadi krama desa sane wenten ring wawidangan Desa Pakraman Sengkidu lan sane wenten ring dura desa.
2. Undag susun lima ring kawentenan meru, pinaka ngamanggehang pamikukuh kawentenan Nagara Pancasila.
3. Genta, pinaka lambang cihna bhakti umat ring Ida Sanghyang Widhi.
4. Keris, pinaka lambang trepti lan krettaning jagat.
5. Tunjung putih, pinaka lambang kanirmalan (kasucion) Desa Pakraman Sengkidu.
 - 5.1 Daun tunjung tatiga, pinaka lambang Desa Pakraman Sengkidu kasanggra antuk tigang banjar adat, luwire :
 - 5.1.1 Banjar Pakraman Subagan
 - 5.1.2 Banjar Pakraman Karangasem
 - 5.1.3 Banjar Pakraman Mendira
 - 5.2 Sekar tunjung kusuh kakalih, pinaka lambang truna lan truni sane pacang ngalanturang minakadi negtegang kawentenan wawangunane ngawerdiang kahuripannya kawekas.
 - 5.3 Sekar tunjung mekar, pinaka lambang sewaka widya sastra ring swadharanya oih truna lan truni.
6. Padi lan kapas, pinaka lambang gemah ripah loh ginawe jagadhita kapanggih.
7. Dwi Lingga Pusaka artin ipun :

Dwi, saking bahasa Sansekerta artin ipun kakalih.
Lingga, arti ring bahasa Bali, artin ipun linggih minakadi genah malinggih (singgasana).
Pusaka, artin ipun warisan.
Dwi Lingga Pusaka artin ipun linggih Ida Sanghyang Widhi hamung kakalih, pinaka warisan, katurunan antuk wahyu sane kasungkemin oih Desa Pakraman.

Pamekas smertin pralambang Desa Pakraman Sengkidu, krama Desa Pakraman Sengkidu sane kasanggra tigang banjar pakraman rawuhing truna truni sane rajeg magama Hindu saha mikukuhin Pancasila, kadasarin antuk sradha lan bhakti ring Ida Sanghyang Widhi, ngupadi kajagadhitinan, kasukerttan sakala niskala, malarapan pralinggan Ida Sanghyang Widhi Wasa kakalih pinaka warisan, sane katedunang sanunggil rahina Purnama Kalima sane kasinanggeh Usaba Sambah.

DAGING AWIG-AWIG

DESA PAKARAMAN SENGKIDU

MURDDHA WAKYA	i
PRALAMBANG DESA PAKRAMAN SENGKIDU	ii
ARTOS PRALAMBANG DESA PAKRAMAN SENGKIDU	iii
DAGING AWIG-AWIG	iv
PRATHAMAS SARGGAH : HARAN LAN WAVIDANGAN DESA	1
DWITYAS SARGGAH : PIKUKUH LAN PATITIS TATUJON	2
TRITYAS SARGGAH : SUKRETTA TATA PAKRAMAN	2
Palet 1 : Indik Krama	2
Palet 2 : Indik Prajuru Desa	7
Palet 3 : Indik Kulkul	9
Palet 4 : Indik Sangkepan uthawi Paruman	10
Palet 5 : Indik Druwen Desa	12
Palet 6 : Indik Laluputan	16
Palet 7 : Indik Dadosan Patedunan	16
Palet 8 : Indik Halangan uthawi Rarampagan miwah Pangohot	17
Palet 9 : Indik Bhaya	17
Palet 10 : Indik Panyanggra Banjar, Krama Desa	18
CATHURTYAS SARGGAH : SUKRETTA TATA PALEMAHAN	18
Palet 1 : Indik Tegal, Bangket lan Karang	18
Palet 2 : Indik Kakayonan	20
Palet 3 : Indik Wawangunan	22
Palet 4 : Indik Wawalungan	24
PANCAMAS SARGGAH : SUKRETTA TATA AGAMA	26
Palet 1 : Indik Dewa Yadnya	26
Kaping 1 : Indik Kahyangan	26
Kaping 2 : Indik Pangaci-acı	27
Kaping 3 : Indik Pamangku	29
Kaping 4 : Indik Sukrettan Pura Kahyangan	31
Kaping 5 : Indik Cuntaka miwah Sosot	32
Palet 2 : Indik Resi Yadnya	35
Palet 3 : Indik Pitra Yadnya	36

Palet 4 : Indik Manusa Yadnya	39
Palet 5 : Indik Butha Yadnya	40
SAT SARGGAH : SUKRETTA TATA PAWONGAN	41
Palet 1 : Indik Rangkat	41
Palet 2 : Indik Belas Makurenan uthawi Nyapyan	43
Palet 3 : Indik Balu	44
Palet 4 : Indik Santana	44
Palet 5 : Indik Wawarisan	45
SAPTAMAS SARGGAH : WICARA LAN PAMIDANDA	46
Palet 1 : Indik Wicara	46
Palet 2 : Indik Pamidanda	46
ASTAMAS SARGGAH : NGUWAH-NGUWUHIN AWIG-AWIG	48
NAWAMAS SARGGAH : PAMUPUT	48

PRATHAMAS SARGGAH
HARAN LAN WAWIDANGAN DESA

Pawos 1

- (1) Desa puniki mawasta Desa Pakraman Sengkidu, salantur ipun kinucap kalih kasuratang sajroning ilikita “Desa Pakraman Sengkidu”.
- (2) Jebag kakuwub wawidangannya mawates nyatur :
 - ha. Tepi siring Wetan utawi Kangin : Panepin Desa Pakraman Nyuhobel
 - na. Tepi siring Kidul utawi Kelod : Sagara Indonesia
 - ca. Tepi siring Kulon utawi Kawuh : Panepin Desa Pakraman Buitan
 - ra. Tepi siring Kaja utawi Kaler : Panepin Desa Pakraman Pekarangan, minakadi Desa Pakraman Tenganan Dauh Tukad.
- (3) Sajroning wawengkon Desa Pakraman Sengkidu, wenten babanjaran sowang-sowang, mawasta :
 - ha. Banjar Pakraman Subagan
 - na. Banjar Pakraman Karangasem
 - ca. Banjar Pakraman Mendira
- (4) Sowang-sowang banjar hinucap karemba antuk pahuman utawi tempek, Iwire :
 - ha. Banjar Pakraman Subagan karemba antuk :
 - 1) Pahuman Luput
 - 2) Pahuman Darmadi
 - 3) Pahuman Ginadi
 - na. Banjar Pakraman Karangasem karemba antuk :
 - 1) Pahuman Bendesa
 - 2) Pahuman Badung
 - 3) Pahuman Darya
 - ca. Banjar Pakraman Mendira karemba antuk :
 - 1) Tempek Kangin
 - 2) Tempek Kelod
 - 3) Tempek Kawuh

DWITYAS SARGGAH

PIKUKUH LAN PATITIS TATUJON

Pawos 2

Maka pikukuh Desa Pakraman Sengkidu, ngarajegang, mikukuhin, kalih mitindihin :

- (1) Pancasila
- (2) Undang Undang Dasar 1945
- (3) Tri Hita Karana

Pawos 3

Desa Pakraman Sengkidu ngamanggehang patitis tatujuon, lwir ipun :

- (1) Ngutamayang tata cara maagama Hindu
- (2) Ngawangunang katreptyan sajroning desa pakraman, mangda kasidhan rajeg katreptyaning praja.
- (3) Ngawredhyang kawicaksanaan minakadi kapradnyanan, maka larapan gumawe gemuh landuhing praja.
- (4) Ngamanggehang kalih ngawredhyang padruwyuning desa, majalaran kawicaksanaan guna laksana manut dharma prawretti.
- (5) Ngarajeganag Dharma Agama miwah Dharma Nagara.

TRITYAS SARGGAH

SUKRETTA TATA PAKRAMAN

Palet 1

Indik Krama

Pawos 4

- (1) Sane kabawos krama desa pakraman Sengkidu, lwire :
 - ha. Sang sapa sira hugi jenek magenah ring wawengkon desa pakraman Sengkidu ngamong ayahan desa, banjar, pahuman uthawi tempek turmaning nyungkemin saha nyungsung kahyangan desa, sajaba punika kasinanggeh krama tamyu.
 - na. Sang sapa sira hugi wed saking desa pakraman Sengkidu, jenek magenah ring dura desa liwaring desa pakraman Sengkidu, nanging kantun mipil ring banjar sinalih tunggil pahuman, tempek, banjar pakraman sane wenten sajroning desa pakraman

Sengkidu, sane mula pagenahannya nguni, minakadi sane mipil ring desa pakraman Sengkidu.

(2) Papalihan krama desa, kadi hinucap ring sor puniki :

ha. Krama Ngarep, inggih punika krama desa sane bulangkep, wed saking desa pakraman Sengkidu, sane sampun mipil ring pahuman minakadi ring tempek banjar sinalih tunggil sane wenten ring wawengkon Desa pakraman Sengkidu, maayahan sahurah-arih matata turun cumek.

na. Krama Unggu, inggih punika prati santana krama desa sane lanang, nanging durung bulangkep.

ca. Krama Panii, inggih punika krama desa sane sampun patut tedun ngayah, nanging durung bulangkep.

ra. Krama Nyada, krama desa sane sampun tan keni ayahan, Iwire :

1) Sangkaning pinunas ngeraga tur sampun polih lugraha manut panglokikan prajuru desa, kalih pamutus paruman desa.

2) Mabukti sungkan rahat tur suwe, kantos tibanan, sungkan tan siddha waras, tan siddha maayahan manut panglokikan prajuru desa.

3) Sampun mayusa 60 warsa manut panglokikan prajuru desa.

4) Sangkaning kasundul antuk okane lanang sane pinih unggur marabyan.

ka. Krama Balu, krama desa lanang wyadin istri, sane katinggal seda antuk rabine, lanang sane kakawonin nyapihan antuk rabinya, wenten balu camput, wenten balu masantana.

da. Krama ring dura desa, inggih punika krama desa sane bulangkep mawed saking desa pakraman Sengkidu, jenek magenah ring dura desa liwaring desa pakraman Sengkidu, nanging manggeh mipil ring pahuman, tempek, banjar sinalih tunggil sane wenten sajroning desa pakraman Sengkidu, sane mula pagenahanya nguni, minakadi sane mipil ring desa pakraman Sengkidu.

ta. Krama Tamiyu, inggih punika krama sane kinucap ring sor puniki :

1) Sang sapa sira hugi saking dura desa liwaring desa pakraman Sengkidu jenek magenah, madunungan ring pomahaning krama desa, magenah ring pomahaning druwen guru wisesa, hotel, miyah salwir ipun, sasampun tigang sasih uthawi 105 dina, nanging kari manggeh makrama desa ring kamulan desanya, kabuktyang antuk surat sasinahan saking kelihan desanya.

2) Sang sapa sira hugi wed saking liwaring desa pakraman Sengkidu, makakubon ngenahin palemahan tegal, carik, palasan ring wawengkon desa pakraman

Sengkidu, nanging kari manggeh makrama desa ring kamulan desanya, kabuktyang antuk surat sasinahan saking kelihan desanya.

- 3) Sang sapa sira hugi jenek magenah ring wawengkon desa pakraman Sengkidu, yan tan magama Hindu, taler sinangeh tamu, tan sareng sapalikramaning agama Hindu ring desa pakraman Sengkidu.

sa. Tamu, inggih punika sang sapa sira hugi rawuh ka jroning desa pakraman Sengkidu, nanging tan nekeh magenah irika, sang karawuhan tamu patut matur supeksa ring prajuru desa, kalih ring sang amawa rat, sajroning arahina ring awengi, yan tan asapunika, prajuru desa wenang maritetes, yan macihna wenten mamurug awig-awig, paswara, miyah pamutus pararem desa, sang nerima tamu keni danda manut pararem desa, tamu hinucap katur ring sang amawa rat.

Pawos 5

Ngawit tedun makrama desa, ring desa pakraman Sengkidu :

- (1) Krama Desa Ngarep, malarapan antuk tateragan pahuman, tempek, banjar, Iwire sampun bulangkep saha sampun ngamargiang widhiwidhana pawiwanan sanistanya sampun puput mabyakawon tur ngaturang upasaksi ring Pura Bale Agung kasaksinin antuk prajuru desa.
- (2) Krama Nyeledihi, malarapan antuk tateragan pahuman, tempek, banjar sang katerag nyeledihi risampun mayusa 17 warsa uthawi sampun munggah truna, sampun mrasiddhayang nganutin krama, manut panglokikan prajuru desa.
- (3) Sang sapa sira hugi wed saking dura desa, jenek magenah ring wawengkon desa pakraman Sengkidu, sasampun tigah sasih uthawi 105 dina katerag antuk prajuru desa pakraman Sengkidu.
- (4) Krama desa wed saking desa pakraman Sengkidu, matinggal ka dura desa wastu malih mawali ka desa pakraman Sengkidu :
- ha. Yan sangkaning rahayu kalih saking palugrahan prajuru desa pattingale nguni, wenang mawali mipil sinalih tunggil pahuman, tempek, banjar pakraman sane wenten sajroning desa pakraman Sengkidu, nganutin sukrettan banjar punika.
- Na. Yan sangkaning tan rahayu pattingale nguni, yogya kelihan pahuman, tempek, banjar sane katuju ngatengahang babawose ka desa, mangda kabawosin antuk prajuru desa, yan katinutin tatepasan prajuru desa punika manut pamutus pararem desa, tur kacihnyang antuk maguru piduka ring sinalih tunggil Pura Kahyangan Tiga desa pakraman Sengkidu, prasidha kalugra mipil pinaka krama desa pakraman Sengkidu.

Pawos 6

- (1) Husan makrama desa ring desa pakraman Sengkidu :
 - ha. Sangkaning seda
 - na. Sangkaning pinunas ngaraga, saha polih palugrahan prajuru desa ring paruman desa
 - ca. Tedah uthawi tilar saking agama Hindu
 - ra. Kasepekang saha kaheladang antuk desa
- (2) Sang husan makrama desa tan polih babagian druwen desa.
- (3) Sang husan makrama desa sangkaning tan rahayu patut nyukserahang tanah karang desa ring desa pakraman Sengkidu uthawi ring banjar pakraman Mendira.

Pawos 7

Swadharmaning krama desa :

- (1) Krama Ngarep, yogya keni paayah-ayah mamungkul, matata turun cumek, nyanggra sarajakaryan desa, manut hunggwan sowang-sowang.
- (2) Krama Unggu, lputut paayah-ayah, urunan miwah papeson.
- (3) Krama Panihi, keni paayah-ayah, urunan miwah papeson lanang.
- (4) Krama Nyada, dados kaarahn pacang tedun ka desa yan buwat pacang mapapineh, mababawos, ngawangun pangrencana salwire sane kabuwatang antuk prajuru desa.
- (5) Krama Balu Lanang, keni paayah-ayah miwah papeson lanang.
- (6) Krama Balu Istri, lputut paayah-ayah miwah papeson.
- (7) Krama Balu Lanang sane madruwe oka istri, Balu Istri sane madruwe oka lanang sampun hantes maayahan manut panglokikan prajuru desa, patut maayahan bulangkep, matata turun cumek, bulangkep antuk pyanak.
- (8) Krama desa ring dura desa, yogya ngaturang panahub ka desa ngamasa-masa, sanangken aci Usaba Sambah gung artha manut pamutus pararem desa minakadi ngaturang dana pawangunan, ritatkalaning desa mapawangun, ngayum wawangunan sane kadruwe antuk desa pateh ring krama ngarep.
- (9) Krama Tamnyu sane maagama Hindu sane bulangkep, yogya ngaturang panahub ka desa ngamasa-masa gung artha manut pamutus pararem desa minakadi ngaturang dana pawangunan, ritatkalaning desa mapawangun, ngayum wawangunan sane kadruwe antuk desa, gung artha manut sakasiddhan krama suka.
- (10) Krama desa sane maagama Hindu sane asele sane jenek ring desa pakraman Sengkidu, yogya ngaturang sasabuhan ka desa ngamasa-masa gung artha manut pamutus pararem desa sane katawur ngasasih, minakadi ngaturang dana pawangunan

ritatkalaningg desa mapawangun, ngayum wawanganan sane kadruwe manut sakasiddhan.

- (11) Krama Tamu sane tan maagama Hindu yogya ngaturang jinah sasabuhan manut pamutus pararem desa.
- (12) Krama desa samyan yogya saturut ring daging awig-awig desa pakraman Sengkidu, paswara miyah pamutus pararem desa, ngutsahayang mangda kasiddhan mapikolih sakadi patitis tatujon desane kinucap ring hayun, tumus mamangguhang kajagaddhitinan praja.
- (13) Sang sapasira hugi sane pacang ngadol, ngantahang, maselangang, majegang, masewayang, makedihang palemahan tegal, palasan miyah sapanunggilan ipun sane magenah sajroning wawidangan desa pakraman Sengkidu, hugi mangda polih palugrahan saking prajuru desa, yan tan polih palugrahan yogya indike punika kahandegang.
- (14) Sang sapa sira hugi magenah ring wawidangan desa Sengkidu, tan makrama desa, tan kalugra ngalaksanayang panca yadnya ring wawidangan desa Sengkidu, tan kalugra ngganggen salwiring druwen desa.
- (15) Krama Tamu sane tan maagama Hindu swadharman ipun kaunggahang sajroning paswaran desa.

Pawos 8

Phalapeksaning krama desa :

- (1) Krama desa samyan yogya polih pasayuban wyadin pangoban saking desa, salwiring wyawaharanya uthawi wicaranya yogya kabawosin antuk prajuru desa manut tata titining wicara.
- (2) Krama desa samyan sane maagama Hindu sajaba tamu wenang ngalaksanayang panca yadnya sajroning desa pakraman Sengkidu, manut desa, kala, patra, sastra-agama, miyah nganutin sitan desa hinucap.
- (3) Krama desa Ngarep, wenang polih babagan layuban aci-aci salwir ipun, twas-twasan miyah sawosan sane patut katiba ring krama desa.
- (4) Mapawangkid, mapiteges nunas kaluputan ayah-ayah, ritatkala sungkan minakadi cuntaka.
- (5) Ngidih, mapiteges ngaluputin ayah, urunan miyah papeson ritatkalaning sungkan, nanging sasampun kenak, patut kakeninin ayah-ayah, urunan miyah papeson manut hungwan sowang-sowang krama.

- (6) Sane dados nyuksukin ayahan sang tan tedun mayahan, yogya saking panglokikan kalih palugrahan prajuru desa.

Palet 2

Indik Prajuru Desa

Pawos 9

- (1) Desa pakraman Sengkidu kahemong antuk Prajuru Desa.
- (2) Prajuru desa pakraman Iwire :
- ha. Kelihan desa
 - na. Patajuh Kelihan desa
 - ca. Panyarikan desa
 - ra. Juru raksa
 - ka. Kelihan banjar pakraman, Kelihan pahuman, Kelihan tempek
 - da. Patangan desa Iwire, patangan desa sane ngamongin parhyangan, pawongan, palemahan, undagi, kelihan pamangku, kelihan pacalang, kelihan sekaa gong, kelihan sekaa teruna.

Pawos 10

- (1) Sane wenang kahadegang, wyadin kamanggehang dados prajuru desa pakraman Sengkidu, Iwire :
- ha. Krama Ngarep, sane jenek magenah, makrama desa, matata tuun cumek, maayahan sahurah-arih ring desa pakraman Sengkidu.
 - na. Tan cedangga, sakadi peceng, perot, cungih lan sapanunggilan ipun, sane katandangin kabakta saking wahu embas.
 - ca. Wikan mamawos kalih nyurat aksara Bali uthawi Latin.
 - ra. Mabukti tan nahen malaksana corah.
- (2) Pidabdab ngadegang prajuru desa :
- ha. Prajuru desa patut ngadegang panitia sane yogya midabdabin pamargin ngadegang prajuru desa.
 - na. Sowang-sowang banjar wenang nyudi krama desa ngarep pinaka babakalan uthawi calon prajuru, babakalan kelihan miwah patajuh kelihan.
 - ca. Krama desa sane kasudi pinaka babakalan uthawi calon prajuru tan dados kahadegang panitia pemilihan.
 - ra. Sane patut tedun pacang mamilih kelihan desa miwah patajuh sane apasang, Iwire krama desa miwah krama ring dura desa wed saking desa pakraman Sengkidu.

- ka. Sane patut tedun pacang mamilih panyarikan miwah juru raksa, inggih punika utusan krama manut pararem desa.
- (3) Lamine ngadeg dados prajuru desa limang warsa ngawit saking dina pawintenane sajaba kapadgatakalan.
 - (4) Yan sang sampaun nahen madeg pinaka prajuru desa **wenang** kasudi malih.
 - (5) Juru arah uthawi saya arah kasudi antuk kelihan desa, saya aci kasudi antuk kelihan pahuman minakadi tempek manut sakabuwatan desa.
 - (6) Kelihan banjar, kelihan pahuman, minakadi kelihan tempek kahadegang malarapan antuk pamilihan oilih kramanya sowang-sowang.
 - (7) Prajuru desa Iwire : kelihan desa, patajuh, patut mawinten ring Pura Bale Agung, prajuru desa sawosan patut majaya-jaya ring Pura Bale Agung Sengkidu, munggwing dewasa manut pararem desa rikala ngadegang prajuru desa hinucap.

Pawos 11

Swadharmaning Prajuru Desa :

- (1) Midabdabin desa, krama desa, sajroning ngupadi kajagaddhitam sakala niskala, maka darsana awig-awig desa, paswaran desa, pamutus pararem desa, nganutin sastra Agama Hindu minakadi uger-uger nagara.
- (2) Ngarancana salwiring utsahan desa kahungkur, minakadi ngarancana salwiring sane nyandang pacang wanguang, sane patut hayum, manut lokika, desa, kala, patra, sane mabuwat, mangda kasiddhan polih palugrahan Guru Wisesa.
- (3) Mamawosin salwiring wyawahara sane wetu sajroning desa Sengkidu, niwakang tatimbang uthawi pamutus babawos sane yogya kaputusang sajroning desa pakraman, yan tan kasiddhan kabawosang ring desa, prajuru desa mituduhang mangda ngaturang ring guru wisesa mangda kabawosin.
- (4) Kelihan desa patut mratyaksa, nulingayang saparipolah prajuru desa, Iwire : kelihan banjar, kelihan pahuman, kelihan tempek, pamangku-pamangku desa, minakadi sawosan sane wenten sajroning wawengkon desa Sengkidu.
- (5) Midabdabin salwiring pamargin haci-aci ring desa pakraman Sengkidu, taler nulingayang krama desa indike ngalaksanayang Panca Yadnya.
- (6) Wenang nyanggra salwiring pituduh, minakadi saraja karya saking guru wisesa, werat uthawi ringan, sane yogya katiwak ring desa pakraman.
- (7) Pinaka dutta pacang matemuwang babawos ring sang sapasira hugi, yan paindikan punika kapineh nyandang pacang marginin.

- (8) Wenang ngawangunang langlang desa kawastanin pacalang, sane patut ngalanglangin saraja karyan desa, nulinga katreptyan sawawengkon desa pakraman Sengkidu, salantur ipun indik ngadegang, swadharma miyah swadikaran ipun mungguh sajroning paswaran desa.
- (9) Wenang ngawangunang prajuru padgatakala minakadi ngawangunang sekaa-sekaa sawosan sane pacang ngaremba swadharman prajuru desa sane kabuwatang.

Pawos 12

Phalapeksaning Prajuru Desa :

- (1) Luput urunan miyah papeson ring desa, banjar lan pahuman minakadi tempek.
- (2) Wenang polih tuwas-tuwasan manut dresta kuna minakadi paswaran desa.
- (3) Wenang polih tuwas-tuwasan sane sawosan sane patut katiwak manut pararem desa.

Pawos 13

Prajuru desa kagentosin uthawi husan, majalaran antuk :

- (1) Seda.
- (2) Mabukti sungkan rahat tur suwe minakadi tan siddha ngamargyang swadharma.
- (3) Mapinunas sangkaning rahayu, sasampun polih lugraha saking paruman desa.
- (4) Majalaran tutug sengker pangadege.
- (5) Sangkaning kahusanang antuk paruman desa dwaning mabukti iwang.

Palet 3

Indik Kulkul

Pawos 14

- (1) Sajroning wawengkon desa Sengkidu, wenten babacakan kulkul, kadi ring sor puniki :
 - ha. Kulkul pura
 - na. Kulkul desa
 - ca. Kulkul banjar
 - ra. Kulkul pahuman
 - ka. Kulkul tempek
 - da. Kulkul sekaa-sekaa
 - ta. Kulkul paibon uthawi dadya
 - sa. Kulkul pura penataran
 - wa. Kulkul paumahan

- (2) Munggwing swaran kulkul punika mangda mabhina-bhinayan sawiji sowang manut sor singgih, yan wenten swaran kulkul pateh, karun wyadin sawer, mangda kapastika salah sawiji antuk sang madruwe.
- (3) Nepek kulkul manut Tri Brata Sandi : dharma, sima, laksana, teges ipun :
 - ha. Dharma : swaran kulkul maka cihna wyadin tatenger upacara agama wyadin yadnya.
 - na. Sima : swaran kulkul maka cihna wyadin tatenger panca bhaya.
 - ca. Laksana : swaran kulkul maka cihna wyadin tatenger patedunan.
- (4) Indik tatepekan kulkul manut pasobhaya, kuna dresta minakadi paswaran desa pakraman Sengkidu.
- (5) Hunggwan nepek kulkul :
 - ha. Yan nepek kulkul tatenger patedunan, hugi kulkul sane kadruwe antuk krama sane pacang tedun, katepek antuk sang patut ngulkulang.
 - na. Yan nepek kulkul tatenger panca bhaya, wenang saunggwan-unggwan, asing nampek genahe, wenang katepek antuk sang rihinan manggihin bhaya punika, minakadi sangkaning pituduh sang ngawiwenang.
 - ca. Yan nepek kulkul tatenger upacara agama, dewa yadnya, bhuta yadnya, manusia yadnya, pitra yadnya, wenang kulkul sane wenten ring sowang-sowang genah upacarane. Yan nyelang kulkul sawosan patut wenten palugrahan sang ngawiwenangang.
 - ra. Yan kalaning ngalungayang bhatara, mendak bhatara, bhatara turun kabeh, kalaning pacaruwan desa, sami kulkule sajroning desa dados swarayang, tatepekan manut krama.
 - ka. Yan wenten sinalih tunggal mamurug nepek kulkul tan manut krama, yogya kabawosin antuk prajuru desa, katiwakin panglokika saba pamidandha manut paswaran desa.

Palet 4

Indik Sangkepan uthawi Paruman

Pawos 15

Munggwing sangkepan uthawi paruman ring sajroning desa pakraman Sengkidu, kadi ring sor :

- (1) Sangkepan uthawi paruman sane kalaksanayang nyabran ngasasih, Iwire :
 - ha. Sangkepan uthawi paruman prajuru pangarep, Iwire sane nedunin kelihan desa, patajuh kelihan desa, panyarikan, juru raksa miwah utusan pahuman sowang-

sowang kalih diri, kala dina Redite Umanis, ngasasih, magenah ring Kantor Kelihan Desa.

- na. Sangkepan uthawi paruman prajuru desa magenah ring Kantor desa satunggil dina Redite Pon.
 - ca. Sangkepan uthawi paruman desa magenah ring Bale Desa satunggil dina Redite Kliwon.
 - ra. Sangkepan uthawi paruman banjar lan pahuman minakadi tempek satunggil Redite Pahing.
- (2) Sangkepan uthawi paruman padgatakala majalaran arah-arah manut sakabuwatan.
- (3) Sangkepan sekaa-sekaa kawentenang manut sakabuwatan.
- (4) Sahanan paruman hinucap prade kapiyalang, wenang rangkadang manut sakabuwatan.

Pawos 16

- (1) Sane yogya nedunin sangkepan prajuru desa punika, Iwire : prajuru desa, utusan saking sekaa-sekaa manut wiguna, minakadi sang sapasira hugi kabuwatang antuk prajuru desa.
- (2) Sane patut nedunin sangkepan uthawi paruman desa, Iwire : prajuru desa, krama desa, minakadi sang kabuwatang antuk desa.
- (3) Sangkepan uthawi paruman prasiddha lumaksana risampun katedunin antuk sanistanya aparo rangkung adiri antuk sang patut ngamiletin, kamanggala antuk swaran kulkul miwah toyan janggi.
- (4) Maka manggalaning mababawosan sajroning sangkepan uthawi paruman, manggeh panglingsir uthawi kelihan desa, wyadin salah sinunggil prajuru sowang-sowang manut pituduh panglingsirnya.

Pawos 17

Tata kramaning pasangkepan wyadin paruman :

- (1) Sang pacanag ngamiletin :
 - ha. Paruman desa, mabusana adat jangkep, tur patut nyungklit keris ring tengen.
 - na. Paruman sane sawosan, mabusana adat madya.
- (2) Saya patut makta pasayaan, tegep eteh-etehe pasayaan salwir ipun, minakadi haturan canang panaracak, saha pasegeh, manut dresta kuna.
- (3) Yan kapatut pacang nganggen babanten sakabuwatan, prajuru desa yogya mituduhang mangda cumawis, saha nyukserahang padagingan ring sang kapituduh makarya babanten ika.

- (4) Babawosan sajroning sangkepan miyah paruman desa, hugi ngupadi karahayon jagat, mnakadi ngarajegang kamuruban Sanghyang Widhi majalaran bhawa laksana manut catur dresta, Iwir ipun : sastra dresta, loka dresta, kuna dresta miyah desa dresta.
- (5) Tan kalugra nguman-uman, wak caphala minakadi salwiring sane ngawinang byota sajroning sangkepan, yan wenten mamurug keni pamidanda manut pamutus pararem desa.
- (6) Yan wenten sinalih tunggil krama ngatengahang babawos sajroning sangkepan, yogya kadamyakang, yan nyandang bawosin, yogya rinawosan, yan tan nyandang bawosin, hantukang ring sang ngamimitin.
- (7) Sane kinucap pamutus babawos wyadin paswara sajroning sangkepan, paruman, yan briyuk sapanggul hanut sang nyangkepin, yan tan sapuni, asing akehan wenang turut manut panglokika, pamutus babawos yogya kalekitayang, kalaksanayang manut hanggeran ipun.
- (8) Prade tan puput babawose sajroning sangkepan uthawi paruman kantos ping tiga sangkepane minakadi parumane, yogya kabawosin sajroning sangkepan desa padgatakala, pamutus babawos sajroning sangkepan padgatakala punika pinaka pamutus pamekas.
- (9) Prade wenten wyawahara uthawi wicara mabuwat, sangkepan uthawi paruman wawu dados kamargyang risampun katedunin antuk krama desa sakirangnya kalih pah tigaan saking krama desa sami.
- (10) Ritatkala macak pamuput paruman, krama tan dados matangi sadurung puput macak sareng sami, yan wenten mamurug keni danda pateh sakadi krama sane nenten nyarengin paruman.

Palet 5

Indik Druwen Desa

Pawos 18

Sane kadruwe antuk desa pakraman Sengkidu, Iwire :

- (1) Pura Kahyangan Tiga miyah Kahyangan Desa, Iwire :
 - ha. Kahyangan Tiga miyah Kahyangan Desa sane kahempon antuk krama banjar Subagan lan banjar Karangasem :
 - 1) Pura Puseh lan Pura Bale Agung Sengkidu, tigang palebahan linggah ipun 34,50 are.
 - 2) Pura Sagara Sengkidu, kalih palebahan linggah ipun 6 are lintang 6 desi are.

- 3) Pura Pasimpangan Ratu Dalem Ped, linggah ipun apalebahan miwah telajakan pura linggah ipun **8** are.
 - 4) Pura Galuh, apalebahan linggah ipun **atengah** are.
 - 5) Pura Penyimpenan, apalebahan linggah ipun 15 are.
 - 6) Pura Melanting, apalebahan linggah ipun **atengah** are.
 - 7) Pura Luhur Bukit Asah, apalebahan linggah ipun 1 are.
 - 8) Pura Penanggun Desa sisi kangin miwah sisi kawuh, sowang-sowang apalebahan linggah ipun **apahempatan** are.
 - 9) Pura Beji Sengkidu kalih palebahan linggah ipun 1 are.
 - 10) Pura Bedugul, apalebahan linggah ipun **apahempatan** are.
- na. Kahyangan Tiga miwah Kahyangan Desa sane kahempon antuk krama banjar Mendira :
- 1) Pura Pamaksan Mendira, tigang palebahan linggah ipun **12** are.
 - 2) Pura Sagara Bale Kandeg Celuk Pandekan, kalih palebahan linggah ipun **4** are.
 - 3) Pura Panyimpenan Mendira, apalebahan linggah ipun 2 are.
 - 4) Pura Beji Mendira, kalih palebahan linggah ipun 1 are.
- ca. Kahyangan Tiga sane kahempon antuk krama desa Sengkidu, Iwire :
- 1) Pura Dalem Kangin, kalih palebahan linggah ipun 1 are lintang 9 desi are.
 - 2) Pura Dalem kauh, tigang palebahan linggah ipun 8 are lintang 6 desi are, miwah Prajapati, apalebahan linggah ipun 1 are.
- (2) Pralinggan bhatara, pajenengan marupa keris.
- (3) Siwa pakranan, minakadi ilen-ilen bhatara karaksa antuk Mangku Gede.
- (4) Lalanguan minakadi tatabuhan, Iwire :
- ha. Sane kadruwe antuk krama banjar Subagan lan krama banjar Karangasem, Iwire :
- 1) Gong a barung
 - 2) Gangsa jongkok petang tungguh
 - 3) Angklung a barung
 - 4) Rejang kompol, rejang dewa, pendet, baris gede miwah wawalen uthawi daratan
 - 5) Pasantian
- na. Sane kadruwe antuk krama banjar Mendira, Iwire :
- 1) Gong a barung
 - 2) Rejang dewa
 - 3) Pendet
 - 4) Baris gede

- 5) Wawalen
 - 6) Pasantian
- (5) Bale desa :
- ha. Sane kadruwe antuk krama banjar Subagan lan banjar Karangasem, Iwire :
 - 1) Bale **Adat** Dharma Kosala
 - 2) Pasar Sinar Pagi Sengkidu
 - 3) Bale Kulkul Desa
 - na. Sane kadruwe antuk krama banjar Mendira inggih punika bale banjar.
- (6) Tanah tegak bale banjar Subagan lan Karangasem, pahuman miwah telajakannya.
- (7) Rurung uthawi margi, telabah, jelinjing sane wenten sawawengkon desa pakraman Sengkidu.
- (8) Karang desa, Iwire :
- ha. Ring palemahan banjar Subagan lan banjar Karangasem katah ipun 215 karang.
 - na. Ring palemahan Banjar Mendira katah ipun 40 karang.
- (9) Setra desa pakaraman Sengkidu ka pah dados 4 manut wiguna Iwire :
- ha. Setra genah mendem anak alit sane hantaka sane durung maketus, wawidangannya ring delod pura Prajapati, linggah ipun sawatara 2 are.
 - na. Setra genah mendem uthawi pakingsan sawa krama desa, wawidangannya ring dawuh pura Prajapati, linggah ipun sawatara 4 are.
 - ca. Setra genah ngeseng sawa lan atiwa-tiwa, wawidangannya ring sisi kauh setra, linggah ipun sawatara 5 are.
 - ra. Setra teben ring sisi kaler kawuh, linggah ipun sawatara 2 are.
- (10) Palaba pura marupa abyans, Iwire :
- ha. Sane kagamel kalih kahelingang antuk krama banjar Subagan lan banjar Karangasem :
 - 1) Palaba Pura Puseh Sengkidu :
 - ha) Nomor 827, Pipil Nomor 245, Persil Nomor 28, Kelas I
 - na) Nomor 829, Pipil Nomor 243, Persil Nomor 26, Kelas I
 - ca) Nomor 830, Pipil Nomor 243, Persil Nomor 24, Kelas I
 - ra) Nomor 832, Pipil Nomor 243, Persil Nomor 16, Kelas I
 - ka) Nomor 1005, Pipil Nomor 243, Persil Nomor 25, Kelas I
 - da) Nomor 1038, Pipil Nomor 243, Persil Nomor 20, Kelas V
 - 2) Palaba Pura Bale Agung Sengkidu :
Nomor 1043, Pipil Nomor -, Persil Nomor -, Kelas -, linggah ipun 1.880 m²
 - 3) Palaba Pura Galuh Sengkidu :

Nomor 834, Pipil Nomor 247, Persil Nomor 41, Kelas V, linggah ipun 26.550 m²

4) Palaba Pura Dalem Sengkidu :

ha) Nomor 838, Pipil Nomor 244, Persil Nomor 5, Kelas I linggah ipun 13.200 m².

na) Nomor 1039, Pipil Nomor 244, Persil Nomor 41, Kelas V linggah ipun 900 m².

na. Sane kagamel kalih kahelingang antuk krama banjar Mendira :

1) Palaba Pura Pemaksan Mendira :

ha) Nomor 833, Pipil Nomor 246, Persil Nomor 31, Kelas I linggah ipun 5.760 m².

na) Nomor 836, Pipil Nomor -, Persil Nomor -, Kelas -, linggah ipun 3.660 m².

ca) Nomor 837, Pipil Nomor -, Persil Nomor -, Kelas -, linggah ipun 1.150 m².

ra) Nomor 284, Pipil Nomor 44, Persil Nomor 10 a, Kelas I linggah ipun 11.870 m².

Pawos 19

- (1) Palaba pura yogya kasakap antuk krama desa pakraman Sengkidu.
- (2) Pralinggan bhatara, ilen-ilen, busana, paayah-ayahan pura kasimpen ring pura Panyimpenan Desa.
- (3) Krama desa patut sareng nitenin saha mratyaksayang padruwen desa.
- (4) Prade desa kicalan mawaneng saking dina katara icale, prajuru desa patut ngamargyang panyangaskara pramangkin, prajuru desa patut ngaturang indik punika ring sang amawa rat, yan sampun wenten pamutus saking sang amawa rat, sang mamandung patut ngawalyang prabeya panyangaskara sane kawijilang antuk desa yan pandung punika wed krama desa.

Pawos 20

Pyolih-olihan Desa Pakraman Sengkidu :

- (1) Olih-olihan saking palaba pura.
- (2) Urunan krama desa.
- (3) Sasabuhan lan pananjung batu.
- (4) Alangan uthawi rarampagan muwah pangohot paturunan bangket.
- (5) Haturan-haturan minakadi dana punia.
- (6) Upettin desa.

- (7) Pyolih-olih sawosan saking utsaha, guna kayan krama desa, minakadi pyolih-olihan sawosan saking patut rahayu.

Palet 6

Indik Laluputan

Pawos 21

- (1) Luput mapiteges nenten keni raramon, wawijilan uthawi papeson kalaning aci.
- (2) Sane luput raramon, wawijilan miyah papeson, lwire :
- ha. Prajuru desa
 - na. Pamangku desa
 - ca. Tukang banten.
 - ra. Juru sapuh.
 - ka. Juru lampu.
 - da. Juru arah.
 - ta. Sang sapasira hugi sane kapineh antuk desa patut nyandang polih laluputan manut paswara.

Palet 7

Indik Dadosan Patedunan

Pawos 22

Dadosan patedunan, sangkepan, tedun makarya miyah sane sawosan, nganutang sukretta sowang-sowang, lwire :

- (1) Yan prajuru desa minakadi desa madruwe patedunane, yogya nganggen sukrettan desa, sane kagaduh antuk prajuru desa minakadi desa, dadosan ngeranjing ka desa.
- (2) Yan babanjaran madruwe patedunane, yogya nganggen sukrettan banjar sowang-sowang sane sampun kagaduh antuk banjar punika, dadosan ngeranjing ka banjar.
- (3) Yan pahuman minakadi tempek madruwe patedunane, yogya nganggen sukrettan pahuman uthawi tempek, dadosan ngeranjing ka pahuman minakadi tempek.
- (4) Yan subak madruwe patedunane, yogya nganggen huger sukrettan subak sane sampun kagaduh antuk subak sowang-sowang, dadosane ngeranjing ka subak.
- (5) Yan sekaa-sekaa madruwe patedunane, yogya nganggen huger sekaa sowang-sowang, dadosane ngeranjing ke sekaa.
- (6) Rikalaning ngayah, patedunan, sangkep prade wenten sinalih tunggil krama matilar sadurung puput karya, minakadi sadurung puput sangkepane, patut krama hinucap

keni dadosan pateh sakadi krama sane tan tedun, sajawaning sampun polih lugraha saking prajurunya sowang-sowang.

- (7) Agung alit dadosane sane katerapang ring wawidangan desa pakraman Sengkidu Iwire: ring desa, ring banjar, ring pahuman minakadi tempek, ring subak-subak, minakadi sekaa-sekaa sawosan mungguh sajroning paswaranya sowang-sowang, saha macacireng palugrahan prajuru desa pakraman Sengkidu.
- (8) Yan wenten krama sinalih tunggal tan tinut ring tatepasan miwah dadosan punika, wenang babawose katengahang ka desa, prajuru desa yogya mamawosin.

Palet 8

Indik Halangan uthawi Rarampagan miwah Pangohot

Pawos 23

Sane wenang halang, rampag, keker minakadi sane wenang keni pangohot, kalih pidabdab ngalang, ngarampag, ngohot mungguh sajroning paswaran desa minakadi pamutus paruman desa manut sakabuwatan.

Palet 9

Indik Bhaya

Pawos 24

- (1) Sane hinucap panca bhaya, Iwir ipun : jiwa bhaya, aghni bhaya, toya bhaya, artha bhaya, bayu bhaya.
- (2) Salwiring bhaya wenang gegerang antuk swaran kulkul.
- (3) Sang sapa sira hugi krama desa sane manggihin wyadin huning ring panangkaning bhaya, ring kang katiben bhaya, wenang gegerang nepek kulkul manut indik kakulkulan bhaya, rarisi damyakang ring krama.
- (4) Rikala wenten swaran kulkul bulus tatenger bhaya, krama desa patut yatna, sayaga, saha sregep ngamong prabot wyadin gagawan sowang-sowang.
- (5) Yan sampun tatas ring bhaya punika, krama desa patut matatulung nambakin, wyadin ngamesehin bhaya punika manut hunggwan, kalih manut patuduh sang yogya ngawiwenangang.
- (6) Sang sapa sira hugi tan kawasa majajabur uthawi majarah rikalaning desa, krama desa katiben bhaya. Yan wenten sinalih tunggal kacacireng mamurug, yogya katengahang ka desa, wyadin katur ring sang amawa bhumi, mangda kabawosin.

- (7) Yan pinangan bhaya punika sampun kapineh nahnah, tan pacang nyangkalen, wenang kacihnyang antuk swaran kulkul lambat atuludan, wyadin pasiyar saking sang ngawiwenangang.

Palet 10

Indik Panyanggran Banjar, Krama Desa

Pawos 25

- (1) Salwiring karya sane lagi kasanggran antuk desa, banjar, pahuman minakadi tempek kapastikayang sajroning pararem desa, banjar, pahuman minakadi tempek, sakadi papatusan minakadi sakabuwatan desa minakadi banjar.
- (2) Saraja karyan desa kasanggra antuk krama desa kahunadikayang antuk prajuru desa.
- (3) Saraja karyan banjar kasanggra antuk krama banjar kahunadikayang antuk kelihan banjar.
- (4) Saraja karyan pahuman minakadi tempek kahunadikayang antuk kelihan pahuman minakadi kelihan tempek.
- (5) Yan wenten krama banjar ngawangun yadnya suka duka, kengin nunas panyanggran pahuman, tempek, banjar minakadi desa manut sakabuwatan.

CATHURTYAS SARGGAH

SUKRETTA TATA PALEMAHAN

Palet 1

Indik Tegal, Bangket lan Karang

Pawos 26

- (1) Palemahan Desa Sengkidu mahuger antuk Tri Mandala, Iwire :
- ha. Uttama Mandala : palemahan sane kaanggen karang pura, wyadin parhyangan.
- na. Madhya Mandala : palemahan sane kaanggen karang pomahan, genah wawangunan, sakadi : banjar, sekolah, kantor, klinik miwah sane sawosan.
- ca. Nista Mandala : palemahan sane kaanggen setra, margi, rurung, telabah, papunduk, tulak tanggul, miwah sane sawosan. Sahanan palemahan sane wenten ring wawengkon desa pakraman Sengkidu yogya mangda madruwe babaledan wyadin wates sane pasti.
- (2) Sahanan palemahan punika, hugi mangda madruwe margi, rurung, papunduk sane dados hentasin.
- (3) Yan wenten pakarangan pura, pomahan, tegal, bangket, miwah palemahan sawosan kabebeng tan madruwe margi, rurung, miwah papunduk, sang madruwe patut

ngatengahang babawose ka desa. Prajuru desa yogya negdeg, ngutsahayang mangda polih margi malarapan sangkaning sami suka. Yan patut matumbas, manut pangargan tanah sane kamanggehang antuk sang amawa rat, sami katahur antuk sang mamuwatang.

- (4) Yan desa pacang ngalinggahang margi, rurung, minakadi makarya margi, rurung desa, saking sampun ingkup paswaran desa kalih sang madruwe tanahe, yan nganggen tegal, bangket, abian miwah palemahan sawosan, wenang tan nawur pangargan tanah punika. Nanging yan madaging tatanduran, papayon, wawanganan salwire, desa patut ngicen prabeya agung alit manut pamutus parembug desa kala punika, tan dados linggahang ring adepa agung.
- (5) Sahananing karang pomahan hugi mangda masengker. Pidabdab nyengker, magaleng ka dulu. Panyengker sane sisi kangin miwah kaler, patut kakaryanin antuk sang ngenahin karang punika.
- (6) Sahananing tegal, bangket wates ring sisi kelod miwah kawuh kypyara antuk sang nruwenang tegal miwah bangket punika.
- (7) Sang sapa sira hugi ngenahin karang tegehan, patut naku, tegehe asukat natah dangsah, sane tebenan, wenang nyusunin tembok.
- (8) Telajakan karang patut kypyara antuk sang ngenahin karang punika sowang-sowang, mangda mapikenoh tur kanten asri.
- (9) Yan wenten sinalih tunggal nyadia nyaleksek wyadin ngaleklek babaledan salwiring babaledan wyadin wawatesan, Iwire : babaledan wyadin wates pura, karang pomahan, bangket, tegal, setra, jlinjing, margi, rurung, papunduk, miwah sane sawosan, yogya katiwakin danda manut werat ringan kahiwangane, saha mahayu sane kasleksek wyadin kaleklek, kalih mrayascita sakabuwatan sane nyandang katibanan panyangaskara.
- (10) Yan hana sinalih tunggil ngaletehin, ngarucakin, ngarobedin, ngararabin palemahan liwaring pomahan padruweyannyane, Iwire : ngutang luhu, bangkaan, miwah salwir ipun, nyorongang babanyon, yogya katiwakin danda gung arta manut pamutus pararem desa, luhu, bangkaan miwah salwir ipun patut katanem oilih sang ngentungang, tur mahayu sane kaletehan, karucakan, karobedan, raraban hinucap ring hajeng, saha mrayascita sane nyandang keni panyangaskara.
- (11) Yan hana anak ngenahin palemahan sajroning wawangkon desa pakraman Sengkidu tan tinut makrama desa nganutin awig-awig miwah paswaran desa, tan kalugra nganggen salwiring padruweyan desa, tan kalugra ngalaksanayang Panca Yadnya sajroning desa Sengkidu. Yan tekaning kapatyan dados sawubang uthawi pendem ring

setra teben uthawi setra pangilang-ilangan, tan polih panyanggran krama banjar minakadi panyanggran krama desa.

- (12) Yan wenten anak tan maagama Hindu ngenahin palemahan sajroning desa pakraman Sengkidu patut nganutin paswaran desa pakraman Sengkidu.
- (13) Sang sapa sira hugi krama desa Sengkidu, yan pacang ngadol, ngantahang, maselangang, majegang, makedihang palemahan sajroning wawidangan desa pakraman Sengkidu, hugi mangda polih palugrahan desa pakraman Sengkidu, yan wenten mabukti mamurug indike punika patut kahandegang.
- (14) Tan kalugra ngadol, ngantahang, maselangang, matimbalang karang desa ring krama siyos waris minakadi krama saking dura desa, sakancan karang suwung kawasa wasita antuk desa pakraman Sengkidu.
- (15) Sane kabawos karang suwung inggih punika karang sane nenten madaging sanggah pawon.
- (16) Sang sapa sira hugi ngenahin karang desa patut ngaturang padana ka desa ngamasa-masa satunggil sasih Kasanga manut pararem desa.
- (17) Prade wenten karang desa neng nanging sampun wenten nruwenang mangda kawangunang sanistanya sanggah uthawi mrajan, pawon uthawi pawaregan, yan tan kawangunin mawaneng limang warsa karang hinucap kadawut antuk desa.
- (18) Prade wenten krama mawicara ngarebatin karang desa mawit saking kulawarga warisan uthawi sane sawosan, wenang prajuru desa mamawosin tur ngicenin pamutus, nanging prade tan cumpu, jantos raris ming tiga matemuang bawos taler pateh pamutuse, prajuru desa ngicenin sang mawicara galah neng a warsa, risampun neng a warsa, sang mawicara kantun manggeh ring sowang-sowang pinunas muwah pakayunan, desa wenang nawut karang hinucap.
- (19) Prade wenten krama desa kelad sangkaning tatiwak paruman desa, karang sane kagenahin kadawut antuk desa.

Palet 2

Indik Kakayanan

Pawos 26

- (1) Tan kalugra nebteb, ngarebah wit-witan salwir ipun ring palasan pategalan, habing, tangkid miyah genah sane sawosan, sane kakeker antuk desa. Yan wenten sinalih tunggil mamurug, katiwakin danda manut lokika, manut paswara, tur taru sane karebah mantuk ka desa.

- (2) Salwir wit-wtan sane sampun kacirenin wyadin kasawenin antuk desa, pacang mangge mapawangun ring desa, lwire : majegau, cempaka, nangka, intaran, wangkal, kayu jati, pradene punika karebah antuk sang madruwe, yogya sang madruwe katiwakin danda, manut lokika, manut paswara, taru wyadin wit-witan sane karebah mantuk ka desa, wyadin ngetang pangarga.
- (3) Yan wenten wit-witan wyadin kakayonan ngungkulin palemahan anak sawos, sane ngawinang tiyeb, tampyas, ngarobedin, asing kungkulon wenang ngatengahang ka desa, prajuru desa maritetes saha mituduhang sang madruwe mangda ngrancap, nebteb, wyadin ngarebah. Yan kantos ping tiga pituduh desane tan kalingu, wenang katiwakan danda sang anikel tuduh, gung arta manut paswara. Kakayonan punika prasidha karebah antuk desa picundangan.
- (4) Sane keni pamidanda saha prabeya manut paswaran desa marep ring wawangunan sang karubuhan lwire :
- ha. Sang nruweang wit taru sane kasinanggeh mayanin.
- na. Sang notor, munggul uthawi ngarebah wit taru hinucap.
- (5) Tanem tuwuh jroning karang pomahan, tan kalugra tegeh ipun lintangan ring jan palit solas, wyadin limang meter, bungkil ipun adepa agung wyadin kalih meter tengah saking panyengkere ngajrowang. Yan mamurug wenten raris ngatengahang ka desa, yogya sang madruwe katiwakin danda gung arta manut paswara, saha ngarebah sajroning tigang rahina saking pamput babawose.
- (6) Kakayonan jroning karang pomahan hugi mapyara mangda tan ngaletehin, ngarobedin, mamayen karang sawosan, saking akah kantos daun ipun. Yan wenten mamurug, tan tulinga ring kakayonan duwe, wenten ngatengahang ka desa, prajuru desa yogya maritetes, saha nepasin manut panglokika kalih paswaran desa.
- (7) Sang sapa sira hugi mapawangun papayon, yan ring panyanding punika wenten wit-witan sane kapineh nyengkalen wawangunan punika kahungkur, sang pacang mapawangun patut nundungin wit-witan sane kapineh pacang nyengkalen, yan tan kapisukayang antuk sang madruwe tunasang pamutus ring prajuru desa.
- (8) Yan wenten wit taru mentik kantos ageng ring babaledan, wates, salwiring babaledan mwang wates, wenten ngatengahang ka desa, patut taru punika karebah, raris pinara tiga, apahtigayan mantuk ka desa, sang madruwe babaledan apahtigayan sowang-sowang.
- (9) Yan wenten sinalih tunggil nundungin tanem tuwuh, kakayonan, sane kaswatah pacang mamayen, wenang kabawosang ring sang madruwe. Yan akas sang madruwe, yogya katengahang ka desa. Prajuru desa negdeg tanem tuwuh wyadin kakayonan punika.

Yan manut panglokikan prajuru desa yogya tundungin, taler akas sang madruwe, patut sepat gantungin. Yan jati kadi panwatahe, yogya sajroning tigang dina, karebah picundangan. Sang madruwe katiwakin danda gung arta manut paswara, dosane anikel tuduh. Yan tan yuki kadi panwatahe, sang ngatengahang katiwakin danda gung arta manut paswara, dosane angadaken nora, tanem tuwuwyadin kakayonan punika tan karebah.

- (10) Yan wenten sinalih tunggil nyadya nandur piper, turus, slawiring tanem tuwuwyadin kakayonan sane pacang dados ageng, nyeseuk ring babaledan, ring wates, papunduk, hugi mangda masupeksa ring prajuru desa, kalih ring panyanding sowang-sowang. Yan tan kalugra tan kapisukayang, pradene taler kapurug, yogya sang mamurug katiwakan danda gung arta manut paswara, tur ngamademang tatandurane.
- (11) Yan wenten sinalih tunggil nyadya nandur piper, minakadi tatanduran sakadi poh, bulwan, duren, wani, mwah sapanunggilan ipun, sane tuwuwyadin panjang ring tegal sasakapan, hugi mangda makarya pasobaya ring sang madruwe tegal hinucap. Yan durung pinganan mawoh tatanduran punika, durung nahen ngalapin woh ipun pinih sor limang pelabuh, durung manut pacang rebah rarisan kajabutin, yogya sang madruwe tegal nawur panjala sawit-sawit, gung arta manut paswara wyadin pasobaya.
- (12) Sang sapa sira hugi nyakap tegal, tan kawasa ngarebah tatanduran sane dados anggen lakar wawangunan, yan tan polih lugra saking sang madruwe tegal minakadi palugrahan prajuru desa.
- (13) Yan wenten wit-witan sajroning pategalan rebah antuk kapanca bhaya tan dados kajarahan antuk sang sapa sira hugi, yan wenten mamurug, keni pamidanda manut panglokika.
- (14) Tan dados marereh-rerehan salwire ring tegal tani druwe, tegal tan sasakapan druwe, yan tan kapisukayang, yan wenten mamurug, wenten rarisan ngatengahang ka desa, keni pamidanda manut panglokika.
- (15) Krama desa patut ngamanggehang kawerdhyan tanem tuwuwyadin sane ngawinang desane asri tur lestari.

Palet 3

Indik Wawangunan

Pawos 27

- (1) Sang sapa sira hugi krama desa sawawengkon desa pakraman Sengkudu, yan pacang ngawangun panyengker karang pomahan, patut masupeksa ring panyandinge. Yan tan

radin yogya nunas degdegan ring prajuru desa, prajuru desa negdeg sadu hajeng sang mawicara.

- (2) Wawangunan ring palemahan pecak tegal, bangket, palemahan suwung, sane sampun masanggah pawon, palemahan punika prasida kabawos karang pomahan, dwaning sampun katiwakan pangupakaran karang. Awanan patut madruwe rurung betel ka margi agung, sukat dados pacang ngalintangang papaga, dwaning tan kapatut ngalintangang sawa ring tegal, bangket. Yan wenten mamurug, yogya prajuru desa niwakang tatepasan mangda sang mamurug mrayascita palemahan hinucap sane kalintangan.
- (3) Yan tan masanggah panguluning karang, kabawos akakubon. Tan yogya genah ngraksa sawa. Yan wenten mamurug, yogya katiwakan pamidanda mangda mrayascita palemahan punika.
- (4) Yan wenten sinalih tunggil sang sapa sira hugi pacang ngawangun wawangunan genah ngalaksanayang upacara agama Iwire : pura, mesjid, gereja, wihara, miyah sapanunggilan ipun, hugi mangda wenten lekita palugrahan prajuru desa, kalih palugrahan guru wisesa. Yan wenten mamurug kadi kinucap ring hajeng, kabawos tan sidha karya, tan wenang anggenen, tur wawangunan punika yogya wangdeyang.
- (5) Wawangunan jroning karang pomahan, hugi nganutin Tri Mandala, uttama mandala, sanggar panguluning karang, madya mandala, pagenan mapaumahan, nista mandala, ngaran lebuh, jabayan.
- (6) Tan wenang ngungkulang capcapan wawangunan ka jroning karang pomahan sawosan tani druwe. Yan wenten mamurug, wenten ngatengahang ka desa, yogya prajuru desa negdeg, saha nyepat gantungin. Yan jati lintang sajroning selahé rahina saking puput babawose mangda sampun kapastika.
- (7) Tan wenang nganggen tembok umah wyadin tembok panyengker tani druwe. Wenang ya kasambatsara antuk sang madruwe. Yan akas tur mamurug sang kasambatsara, yogya katengahang ka desa, kabawasan antuk prajuru desa.
- (8) Sang sapa sira hugi pacang mapawangun nepi ring margi agung, nepi ring rurung desa, yogya mangda wenten lekita palugrahan saking prajuru desa, wyadin lekita palugrahan sang amawarat. Yan tan polih lekita palugrahan, padgatakala wawangunan punika dados katundungan tan netang prabeyan katundungan.
- (9) Sang sapa sira hugi mapawangun ring pasisi sagara hugi mangda nganutin pidabdab saha palugrahan sang amawa rat.
- (10) Sang sapa sira hugi krama desa ngawengku karang pomahan, yogya hurati myara kahasriyan lebuh pakarangannya, rurung pentasan pinih sor asukat karangnya ngalajur.

- (11) Sang sapa sira hugi pacang ngawangun hotel miyah sapanunggilan ipun ring wawidangan desa Sengkidu, patut mawaneng pinih sor 10 meter saking panyengker rawuh ring dasar wawangunan, tigang meter saking dasar panyengker pura, hugi mangda masengker saha hugi mangda wenten lekita pasobaya kalih palugrahan saking prajuru desa Sengkidu.

Palet 4

Indik Wawalungan

Pawos 28

- (1) Sane kinucap wawalungan, sakancan buron suku pat sane nyadya kapyara, sakadi bawi, banteng, kambing, jaran, miyah sapanunggilan ipun, taler watek makampid sane nyadya kapyara, sakadi ayam, itik, hangsa, dolong, miyah sababacakan ipun.
- (2) Sang sapa sira hugi krama desa sane myara wawalungan suku pat, sajaba hasu, tan wenang ngalumbar. Sane patut matlusuk, mangda matlusuk. Sane tan patut matlusuk, mangda mategul bawong. Sane patut maglogor, makandang, hugi mangda maglogor wyadin makandang. Mangda tan ngarucakin, ngaletehin palemahan tani druwe, miyah mamayen krama desa jana pada. Yan hasu mangda mabelat, lwire makalung bawong, maka cihna wenten sane myara.
- (3) Sang sapa sira hugi krama desa, myara watek suku kalih, watek makampid, ytnain hugi, mangda tan banget ngarucakin, ngaletehin, pomahan, tatanduran druwen anak sawos.
- (4) Tan wenang ngangonang, negulang, hingon-hingon, ubuh-ubuhan, ring palemahan tan druwe, minakadi tan sasakapan druwe, yan tan kapisukayang. Sang madruwe palemahan, prajuru desa, langlang desa, kelihan-kelihan asing mamanggihin, wenang nyambatsara sang madruwe wawalungan ika. Yan akas sang kasambatsara, wawalungan ika wenang taban, prajuru desa yogya niwakang pamidanda manut lokika, gung arta manut paswara.
- (5) Tan wenang ngangonang, negulang ubuh-ubuhan, ring palemahan karang pura, kahyangan salwir ipun, minakadi setra, rurung, papunduk, margi, telajakan, palemahan sane kapingitang, karang suwung, miyah sabacakan ipun. Yan wenten mamurug, prajuru desa, langlang desa, kelihan-kelihan banjar, prajuru sinalih tunggil, asing mamanggihin, wenang nyambatsara, saha naban wawalungan ika, katengahang ka desa, katiwakan danda gung arta manut paswara, saha mahayu yan wenten karusak, tur mrayascita palemahan ika sane nyandang prayascita manut panglokika.

- (6) Yan wenten maubuh-ubuhan sajroning karang pomahan, hugi tlajan mratyaksayang kandang ipun mangda tan ngawetuang bhaya panyungkan. Taler mangda hapik, guriten, siksa, mangda tan kantos ngaletehin, ngarobedin, crobo karang pomahan wyadin palemahan panyandinge. Yan wenten mamurug, tan priksa ring hingon-hingon miyah kandang ipun, wenang panyandinge nyambatsara, wenang katengahang ka desa, prajuru desa nepasin. Wenang katiwakan danda, manut panglokika kalih paswaran desa.
- (7) Sang sapa sira hugi krama desa ngawangunang kandang wawalungan, buwat adol atuku, kandang ayam, itik miyah sapanunggilan ipun, buwat naluhang, miyah adol atuku, dagingan satus ukud. Yan kandang wawalungan suku pat, dagingan adasa hukud, sowang-sowang, ika wenang jroning karang pomahan. Yan lintangan ring punika daging kandange, tan wenang wangunang jroning karang pomahan, yogya kawangunang ring palemahan sane mawaneng sa sor ipun satus depa saking palemahan karang pomahan, sekolah, kantor, pura kahyangan, minakadi genah sane kakeker wyadin kapingitang antuk desa pakraman Sengkidu. Tur mangda madruwe lekita palugrahan saking sang amawa bhumi.
- (8) Yan wenten wawalungan ngarucakin, ngarug tatanduran, wenang taban. Sang madruwe tatanduran ngatengahang ka desa pramangkin, kabawasan antuk prajuru desa, saha katiwakan danda manut lokika paswaran desa.
- (9) Yan godeł banteng, durung matlusuk, godeł jaran uthawi babedag, kambing, miyah sabacakan ipun, durung hantes mategul, tan wenang taban, yan tan ngajak hinan ipun, yogya salabarang ring sang madruwe.
- (10) Yan bebek, hangsa, dolong, ayam, miyah sapanunggilan ipun taler wenang taban. Indike nabani, mangda masaksi, saha kasupeksayang ka desa pramangkin, prajuru desa yogya mamawosin, niwakang pamidanda manut panglokika.
- (11) Yan wenten wawalungan ngeleb, mamegat, ngaranjingin palemahan pura kahyangan, setra, karang pomahan, miyah sane sawosan, lokikanen juga. Yan tan nyadya kalebang, tan yogya taban, wenang salabarang ring sang madruwe.
- (12) Sang sapa sira hugi krama desa Sengkidu, tan kalugra nyorongang babanyon laleteh kandang wawalungan ka pekarangan tan druwe, jalingjing sane wenten sajroning desa Sengkidu. Yan wenten mamurug, katiwakin danda antuk desa gung artha manut lokika, saha paswaran desa. Tur sajroning pitung rahina saking pamuput babawose, salantur ipun tan kari sorong laleteh miyah babanyon punika.

- (13) Tan kalugra medil, nulup, nyaring, minakadi salwiring pamargi pacang ngejuk paksi sane nenten mrana ring wawengkon desa pakraman Sengkidu, yan wenten mamurug katiwakin danda, gung arta manut pamutus pararem desa.
- (14) Sang sapa sira hugi ngarereh hulam ring tukade, ring telabahe, ring jalingjing, miyah sahunggwaning hulam sajroning desa pakraman Sengkidu, tan wenang nganggen tuba, miyah listrik salwir ipun, tan wenang ngrusak hempelan, nguwukang tembuku, yan wenten mamurug, katiwakin danda, gung arta manut lokika saha paswaran desa, tur mahayu sane karusakang.
- (15) Agung alit dadandan punika kahungguhang sajroning paswaran desa Sengkidu, nanging lokika juga wisesa.
- (16) Sakancan dadandan, dadosan sane mungguh ring hajeng, sami mantuk ka desa pakraman Sengkidu.

PANCAMAS SARGGAH SUKRETTA TATA AGAMA

Palet 1

Indik Dewa Yadnya

Kaping 1

Indik Kahyangan

Pawos 29

- (1) Pura Puseh, Pura Bale Agung, Pura Dalem miyah Prajapati, Pura Sagara Sengkidu, Pura Pasimpangan Bhatara Dalem Ped, Pura Galuh Sengkidu, Pura Pananggun Desa Sengkidu, Pura Beji Sengkidu, Pura Luhur Bukit Asah, Pura Melanting, sane kadruwe antuk desa, indik pangaci-aci manut kuna dresta gagaduhan kalih paswaran desa Sengkidu.
- (2) Pura-pura, kahyangan sane sawasan ring sane kinucap ring hayun, papayon kalih pangaci-aci kahemponin antuk krama pamaksan pura, sane nyungsung Bhatara ring pura kahyangan punika sowang-sowang.
- (3) Munggwing beji, papayon kalih pangaci-acinya kahemponin antuk krama desa pakraman Sengkidu.
- (4) Yan wenten karecehan, wicara, sajroning banjar, pangempon pura, kahyangan, subak, minakdi sekaa-sekaa sinalih tunggil, wenang katengahang ka desa, prajuru desa mamawosin, nyahsahang, nepasin wicarane, mangda kasiddhan mawali landuh jatimula.

- (5) Tan wenang nguwah-nguwuhin wawilangan palinggih bhatara, sane wenten ring pura kahyangan sowang-sowang, mangda kantun manggeh kadi kuna.
- (6) Yan wenten pura kahyangan sinalih tunggil, reneng pangaci-acinya, kantos kadasawarsan, yogya prajuru desa mamawosin, maritetes, ngutsahayang mangda kasiddhan mawali kadi jatimula, nanging prade tan kasiddhan, majalaran antuk pamutus paruman desa, prasiddha desa ngawangan pangupacara mralina pura punika, mangda tan karanjingan kaumahin antuk Ki Bhuta Kubandha.

Kaping 2

Indik Pangaci-aci

Pawos 30

- (1) Indik pangaci-aci ring pura kahyangan sane wenten sajroning wawengkon desa pakraman Sengkidu, kahamongin antuk krama desa, manut hemponan wyadin pamaksan sowang-sowang, sajaba sane kahempon antuk krama desa sami. Sowang-sowang pura madruwe gagaduhan, pinaka huger pangaci-aci, miwah babanten.
- (2) Sane yogya muput aci-aci ring pura kahyangan sane kadruwe antuk desa pakraman Sengkidu, Ida Sang maangga sulinggih sane katuhur antuk krama sowang-sowang, minakadi pamangku pura ring pura hinucap manut wawenangan pamangku.
- (3) Yan wenten sinalih tunggil pura durung madruwe pamangku, uthawi pamangkune kapyalang, dados nuhur sinalih tunggil pamangku kahyangan desa, prade taler tan mrasidayang patut nuhur Ida sang maangga sulinggih sane kabriyukin antuk krama desa.
- (4) Pamangku desa, punika wantah pamangku pura Puseh, pura Bale Agung, pura Dalem Kangin, pura Dalem Kauh, pura Galuh, pura Sagara, pura Pamaksan Mendira, pura Sagara Mendira, pura-pura sane kahempon antuk desa sane wenten sajroning desa pakraman Sengkidu kalugra nganteb banten pangodal minakadi sane sawosan ring pura-pura desa pakraman Sengkidu sane mamuwatang, taler manut kawenangan pamangku.
- (5) Ritatkala desa ngawangun karya Tabuh Gentuh, Bhatara Turun Kabeh, minakadi karya agung sawosan, desa dados nyarad pamangku-pamangku kahyangan sakatahe pacang ngaremba pamangku desa.

Pawos 31

- (1) Indik pangaci-aci pura pamrajan, pahibon, dadya, punika kahamongin antuk krama desa sajroning sekaa dadya, pamrajan, manut sima drestanya sowang, tan singsal ring ucaping sastra agama Hindu.

- (2) Pura-pura panyungsungan desa, sajaba kahyangan desa kahempon antuk pamaksannya sowang-sowang.

Pawos 32

- (1) Beji punika kaaci-acinin antuk krama desa. Dina pangodal kalih babanten manut dresta kuna.
- (2) Yan wenten sinalih tunggil beji tan kahaci-acinin, toyan ipun tan yogya anggen sadhana makarya sarwa suci.

Pawos 33

Aci-aci, piodelan, usabha, pasegeh ring kahyangan, lwire :

- (1) Pura Puseh Sengkidu, ring rahina sanunggil Purnamaning Katiga, kasinanggeh Usabha Katiga, sanunggil Purnamaning Kalima, kasinanggeh Usabha Sambah, minakadi pangaci-aci sanunggil rahina Galungan miwah Kuningan.
- (2) Pura Bale Agung Sengkidu, sanunggil rahina Tileming Kapitu.
- (3) Pura Sagara Sengkidu, pura Pesimpangan Bhatara Ratu Dalem Ped, sanunggil rahina Purnamaning Kasa.
- (4) Pura Galuh Sengkidu, sanunggil rahina Tileming Kasanga.
- (5) Palinggih ring Catus Pata, katuran aci sanunggil rahina Tileming Kasanga.
- (6) Pura Dalem Kangin Sengkidu, sanunggil rahina Tileming Kadasa.
- (7) Pura Dalem Kauh Sengkidu, sanunggil rahina Tileming Kadasa.
- (8) Pura Prajapati Sengkidu, sanunggil rahina Tileming Kadasa.
- (9) Pura Pananggun Desa Sengkidu, sanunggil rahina Tileming Kadasa.
- (10) Pura Beji Sengkidu, sanunggil rahina Tileming Kadasa.
- (11) Pura Luhur Bukit Asah Sengkidu, sanunggil rahina Purnama Sadha.
- (12) Pura Panyimpenan Sengkidu, sanunggil Budha Wage Klawu.
- (13) Pura Melanting Sengkidu, sanunggil rahina Budha Wage Klawu.
- (14) Pura Pamaksan Mendira, sanunggil rahina Purnamaning Katiga, kasinanggeh Usabha Katiga, sanunggil rahina Purnamaning Kalima, kasinanggeh Usabha Sambah, muwah rahina Galungan lan Kuningan.
- (15) Pura Sagara Bale Kandeg Celuk Pandekan Mendira, sanunggil rahina Budha Wage Klawu.
- (16) Pura Panyimpenan Mendira, kawentenang sanunggil paaci-aci ring pura kahyangan Mendira.

- (17) Pangaci-aci ring Pura Beji Mendira, kawentenang sanunggil pahaci-aci ring pura kahyangan desa.
- (18) Sajaba pangaci-aci minakadi usabha hinucap ring hajeng, sanunggil Kajeng Kliwon sasih Kanem, ngawit ngawangunang upacara pangayu-ayu desa ngawit saking pura Puseh Sengkidu, manut heedan pamuput ring Kajeng Kliwon sasih Kapitu.

Pawos 34

- (1) Aci-aci kasanggra antuk krama desa, krama pura uthawi pamaksan pura sowang-sowang.
- (2) Lwiring babanten minakadi heed upacara, manut gagaduhan dresta kuna sowang-sowang pura.
- (3) Padagingan pacang ac-aci :
 - ha. Hupon-hupon tanah palaba pura, tanah druwen desa pakraman Sengkidu.
 - na. Piturunan uthawi wawijilan krama desa.
 - ca. Pyolih-olih pagunakayan krama desa.
 - ra. Haturan-haturan sangkaning krama suka nirmala.
- (4) Pasegeh tunggil Kajeng Kliwon, Purnama, Tilem, kasanggra antuk pamangku sowang-sowang. Padagingan saking druwe pura, pamaksan, kahantebang antuk pamangku sowang-sowang.
- (5) Sane kalugra muput salwiring aci-aci ring pura panyungsungan desa pakraman Sengkidu wantah Ida sang maangga sulinggih sane katuhur antuk desa.
- (6) Rikala kabrebehan jagate, kageringan, katiben panca bhaya, pinganan tan mrasidhayang ngaturang aci kadi patute, yogyo prajuru desa miwah pamangku, ngaturang piuning ring bhatara, masadhana babanten padhatengan, pacanangan, makacihna tan pegat aci-acine. Ri wus mawali degdeg jagate, patut ngawangunang upacara bhatara turun kabeh, masasirih, makakobok ka sagara giri.
- (7) Yan ritatkala mamahayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang rangkadang, nanging padhatengan, pacanangan tan dados pegatang. Ri wus puput masasapuh salwire, malih mawali kadi kuna.

Kaping 3

Indik Pamangku

Pawos 35

- (1) Pidabdab ngadegang pamangku lwire :

- ha. Ngambil saking saserod santana wyadin katurunan.
 - na. Saking pawuwus sasemburan wyadin nyanjan.
 - ca. Sangkaning kajujuh saha kabriyukin antuk krama desa pakraman Sengkidu.
- (2) Sane tan wenang kaadegang dados pamangku :
- ha. Cedangga, Iwire : peceng, perot, cungih lan sapanunggilan ipun.
 - na. Mabukti sungkan.
 - ca. Mabukti nahen malaksana corah.
- (3) Sang sapasira hugi pinaka jan banggul, pamangku ring pura Puseh Sengkidu minakadi ring pura kahyangan sajroning desa Sengkidu, mangda pageh ngamel kalih ngalaksanayang sasanan pamangku.
- (4) Sang sapa sira hugi krama desa, sangkaning saserodan, sangkaning kasenengan antuk Bhatara, polih pawuwus saking sasemburan, minakadi kajujuh kabriyukin antuk krama desa, pacang kaanggen pamangku, yan kari alaki rabi yogya lanang istri mawinten.
- (5) Sang kasudi pacang kaanggen pamangku, patut mawinten ring pura genahe dados pamangku, munggwing prabeya kasandangin antuk pamaksan pura sowang-sowang, yan pamangku desa kasandangin antuk krama desa.
- (6) Pamangku patut madruwe hamongan pura sowang-sowang, yan tan madruwe hamongan pura, prasidha tan kalugra ngantebang babanten ring pura-pura salwire.
- (7) Sinalih tunggil pamangku yan katekan pati, yogya tiniwaken. Patut polih patulung prabeya atitiwa, saking krama pura sane kahamongin, yan wus tiniwaken, patut kakaryanang pangelad wyadin papegatan antuk krama pura hinucap sapuputa. Punika yan pamangkune kari rajeg ngamong swadharmaning pamangku kantos hantaka.
- (8) Patiyas uthawi olih-olihan pamangku, Iwire :
- ha. Luput ayahan, urunan muwah wawedalan ring desa, banjar lan pahuman minakadi tempek.
 - na. Piolah cacanangan salwiring papalihan.
 - ca. Sasarin canang apempatan sane kakeniang ring sowang-sowang pura.
 - ra. Patiyas sawosan manut pararem desa.
- (9) Pamangku kagentosin majalaran antuk :
- ha. Seda.
 - na. Mapinunas mararyan, saking patut pinunase, nanging tan kari ngalaksanayang dharmaning pamangku. Kawekas kalaning seda tan polih patulung prabeya atitiwa.

- ca. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadayang antuk krama pura, wyadin desa. Kawekas kalaning seda patut polih patulung prabeya patatiwan.
- ra. Sangkaning kahusanang, majalaran antuk laksana mamurug sasanan pamangku. Kawekas kalaning seda tan polih patulung prabeya atitiwa.

Kaping 4

Indik Sukrettan Pura Kahyangan

Pawos 36

- (1) Ritatkalaning maturan hamung pamangku ring kahyangan punika sane dados munggah tedun ring palinggih-palinggih pura kahyangan hinucap, minakadi sang sampun polih lugraha saking prajuru desa. Yan wenten mamurug katiwakan danda mrayascita palinggih punika.
- (2) Pamangku sane patut ngantebang babanten ring pura, wantah pamangku sane kadruwe antuk pura punika. Yan nenten wenten pamangku ring pura punika uthawi kapyalang dados nyarad pamangku sawosan, saking palugrahan prajuru desa.
- (3) Tan kalugra masumpah, macoran sajroning pura kahyangan sinalih tunggil, sajaba sangkaning wicaran pura hinucap, taler saking pabuwat krama pamaksan pura, uthawi pabuwat krama desa sane ngempon pura punika.
- (4) Tan kalugra wak capala, hasta capala, pada capala miyah sapanunggilan ipun sajroning pura kahyangan. Yan macihna minakadi wenten mamurug, wenten raris ngatengahang ka desa, yogya tiniwakan danda manut pamutus pararem desa, saha pamarisudhan kahyangan.
- (5) Tan kalugra malaksana kantos ngawetuang byota ring pura kahyangan. Yan wenten mamurug kantos mawyadi ring pura, yogya tiniwakan danda gung arta manut pamutus pararem desa kang sadiri, saha marisudha kahyangan punika.
- (6) Sang sapasira hugi kacuntakan, salwiring cunta, yan durung mabresih, tan kalugra ngranjing ka pura kahyangan. Yan katenger wenten mamurug, yogya tiniwakan danda marisudha kahyangan punika.
- (7) Sedahan hengengan miyah sapanunggilan ipun tan kalugra maseha ring pura kahyangan sinalih tunggil, sajaba nyanjan pamangku. Yan wenten mamurug, yogya danda gung arta manut paswara, saha ngawangdeyang maseha.
- (8) Tan kalugra ngawentenang kaklecan, jajuden sajroning suter pura kahyangan desa pakraman Sengkidu. Yan wenten mamurug, sang ngalaksanayang katur ring sang amawa rat, tur kaklecan, jajuden punika kawangdeyang. Sajaba tabuh rah tigang sehet.

- (9) Tan kalugra makta salwiring sane kasinanggeh tan suci ngranjing ka jroning suter pura kahyangan. Yan wenten mamurug, yogya sang mamurug marisudha pura ika.
- (10) Sang sapa sira hugi rikalaning makemit ring pura kahyangan, yan merem, tan kalugra madukan lanang istri, sajaba anak sane kapineh kantun alit, durung rumaja putra. Yan mamurug keni danda manut pangargan beras adasa kilogram kang sadiri, tur mrayascita pura punika.
- (11) Pratingkahe sane tan patut uthawi tan manut lwire :
 - ha. Mundut uthawi nyunggi ring bahu kiwa.
 - na. Nyungklit keris ring kiwa.
 Yan wenten mamurug keni pamidanda mrayascita sakabuwatan.
- (12) Pamaksan sowang-sowang pura kahyangan sawawenkoning desa pakraman Sengkidu, kalugra madruwe sukretta ndiri-ndiri, nanging tan dados singsal ring pasukrettan desa pakraman Sengkidu.
- (13) Pura kahyangan tan wenang anggen sajaba ngalaksanayang upacara agama Hindu. Yan wenten mabukti mamurug sang malaksana kawangdeyang tur pakardinnyane kapuceh, saha sang ngalugrain kadanda manut pangargan beras adasa kilogram, maweweh ngawentenang upacara panyangaskara pabresihan.
- (14) Yan wenten macihna anak wyadin sang sapa sira hugi, katedunan uthawi kapangluh sajroning pura kahyangan sawawenkoning desa pakraman Sengkidu, mababawos minangkenang pangandikan Ida Ratu Sasuhunan uthawi Bhatara, ring gelis tunasang tirta laluputan mangda gelis hudep. Prade sasampun kaketisin tirta, kantun ngatemel masera-masero, ngawetuang sumandeya ring kayun pamaksane, irika patut pintonin, ambilang toya apane, celebaang limannyane makakalih. Yan mabukti tan belus nyandang gega pangandikan Bhatara. Yan prade belus, tan nyandang gega, gelisang gingsirang genahang mangda doh saking pura punika.
- (15) Tan kapatutang nyolahang ilen-ilen, balih-balihan ring pura yan tan manut tatujuon pidabdab upacara ring pura hinucap.

Kaping 5

Indik Cuntaka miwah Sosot

Pawos 37

- (1) Sang sapa sira hugi krama desa sane kahanan cuntaka, tan wenang ngaranjing ka pura kahyangan, ka panyucian kalaning nyuci gening, minakadi genah salwiring genah sane kinucap suci pingit. Tan wenang ngaryanin saji salwiring saji sane pacang katur ka sanggar tawang, sakadi suci gening, minakadi benten salwir ipun sane jaga katur ka

pura, miwah sane katur ring pitra pindha. Munggwing banten sane pacang katur ka Prajapati, Dalem, Panguluning Setra, dados karyanin ring umah sang cuntaka kalaning mangupakara sawa.

(2) Lwir sane kinucap cuntaka :

- ha. Anak istri kalaning ngrajaswala, suwen cuntakane saking ngawit ngrajaswala kantos nyat, macihna sampun malukat.
- na. Sang nganten lanang istri, suwene cuntaka, ngawit saking rahina pangantenane wyadin rahina marangkate, kantos puput mabyakawon masamayut prayascita, malukat, matirta, saha sampun ngaturang pajatyan ring pura Bale Agung uthawi pura Pamaksan Mendira.
- ca. Rama rena cuntaka sangkaning madruwe oka. Lanang istri cuntaka suwene cuntaka petang dasa kalih dina saking wawu hembas rarene saha sampun matirta, malukat.
- ra. Anak istri karuron, pateh cuntakane ring anak ngembasang oka.

(3) Cuntaka malarapan antuk kasedayan, kapatyan :

- ha. Yan sang ngarepin, minakadi sang magenah sajroning karang pomahan sang seda, suwene cuntaka kantos puput marerebu, pinih sor tigang rahina saking puput karyane, macihnyang punah cuntakane antuk marerebu.
- na. Sang polih ngarap sawa, ngamel saha ngarembat saeteh-eteh upakara pula palining sawa, cuntaka adina, punah cuntakane macihnyang antuk malukat.
- ca. Yan sang manjing mijil ring umah sang ngraksa sawa, sasuwen sawa wyadin layone karaksa, pateh cuntakane kadi sang ngarepin sawa ika, luwihi yan tunggil siddhikara, pateh cuntakane kadi sang ngarepin sawa ika.
- ra. Yan manjing mijil ring umah sang ngraksa sawa wyadin layon, sangkaning aninjo, punah cuntakane sasampun masiram saha matirta.
- ka. Sebel karang dados margiyang saking ngawit negtegang daging kantos Ida Bhatara masineb. Wawanengan sebel karang hamung ring sang magenah sajroning karang sane kacuntakan. Yan wenten seda dados pacang ngamargyang sebel karang, patut pendem makingsan kalaning wengi, tan polih panyanggran banjar uthawi desa, sajaba sang tan patut dados pendem.

(4) Cuntaka sangkaning malaksana mamitra ngalang. Suwene cuntaka salamine mamitra ngalang.

(5) Anak wetu sangkaning smara dudu uthawi tanpa widhiwidana pawiwahan, babinjat punika taler cuntaka. Suwene cuntaka salamine durung wenten meras wyadin nuduk ngangkenin pianak uthawi nganggen dadaman.

- (6) Cuntaka sangkaning mabukti madruwe panyungkan sane tan sidha waras salamine, kadi hangganing hila, buduh, ngawijilang reged saking silit, bhaga, purus, tan henap mameres, berung borok tahunan mabanyeh, miyah salwir punika, suwene cuntaka salamine tan waras.
- (7) Cuntaka sangkaning cedangga sane kabakta saking wawu hembas saking garbhawasaning ibu, punika tan kawenang napak palemahan panyucian genah nyuci gening.
- (8) Yan wenten sinalih tunggil sang cuntaka antuk ngraksa sawa wyadin layon, mamanah uthawi mapakayun ngarawuhin karya hayu atma wedhana, minakadi mabakti ring sang wenang kabaktinin, dados, nanging tan wenang ngarap, ngarembat, nyuwun, ngamel saupakaran puspa lingga.
- (9) Yan wenten sinalih tunggil krama desa durung tutug cuntaka kadi ucaping harep, mamurug larangan, yan wenten ngatengahang ka desa, prajuru desa niwakang pamidanda, yogya sang mamurug marisudha sakabuwatan manut panglokika.
- (10) Yan wenten sinalih tunggil anak istri, sangkaning tan meha ngrajaswala sasampun ring pura wyadin ring genah larangane sawosan, raris kacirenan, wenang ya tiwakin danda tan meha, yogya marisudha genah punika, katulung antuk pamaksan pura wyadin pangemonge sowang.
- (11) Rikalaning krama desa tedun makarya, sang kacuntakan tan keni ayahan.
- (12) Yan wenten sinalih tunggil krama desa kacuntakan antuk ngraksa sawa wyadin layon, napkala pagilih pagantosan subak babanjarannya ngaci-aci ring sinalih tunggil kahyangan desa, pacaruan ring desa, sadurung tutug sengker cuntakanya, wenang tan tedun maayahan, tan dinosan, nanging yan wenten pasadok sang cuntaka ring prajuru desa. Yan wus tutug cuntakane, patut naregtek yan kari ngalantur patedunane. Munggwing piturunan, wawijilan daging salwir ipun, yogya katahur naregtek sasampun tutug sengker punah cuntakane. Dados kahetang pangarga.
- (13) Yan cuntaka gamya gamana, prajuru desa nyantosang pamutus sang amawa rat. Yan sampun wenten pamutus saking sang amawa bhumi, ring desa katiwakan danda kadi ring sor puniki, Iwire : mangda mrayascita raga, genah malaksana, kahyangan desa, miyah desa pakraman. Prade yan sang katiwakan pamidanda mamandal kabawosan ring desa, kicen pamutus antuk prajuru desa, manut pamutus pararem desa.
- (14) Cuntaka sangkaning mabukti salah timpal, cuntaka ragan sang malaksana miyah desa pagena'hannya, tutug cuntakane yan sampun sang malaksana mrayascita panyangaskara raga, genah malaksana, desane mrayascita desa. Buron sane kangge somah kapademang tur katanem.

- (15) Anak luh beling tan kapariangken antuk lanange, suwene cuntaka kantos wenten pangupakara panyangaskara kulawisudha, anake istri beling mawidhiwidana pawiwahan masanding keris pinaka linggan sang kadalih.
- (16) Anak luh beling tan kapariangken, suwene cuntaka kantos lekad rarene, saha wenten pangupakara kulawisudha.
- (17) Yan wenten anak mabukti nyolong smara, cuntaka pateh ring cuntaka gamya gamana.

Pawos 38

- (1) Indik Sosot :
 - ha. Yan wenten sinalih tunggil pacang nahur sosot wyadin sasangi, salwiring sasangi, gumanti sane patut nganggen pamegat sot, tan dados nahur sot yan tan kalaning dina piodalan Bhatarra. Nigang dinayang aci-aci, sang pacang nahur sasangi patut sampun masadok ring pamangku pura, yan ring kahyangan desa panahurane, masadok ring prajuru desa. Panahuran sasangi ika, wawu kapuput antuk jro mangku kasaksinin antuk prajuru desa.
 - na. Yan wenten sinalih tunggil nahur sasangi pacang ngaturang pangodal hugi mangda ring dina pagantosan piodalane. Sang nahur sasangi, wenang nunas kanti patulung karya ring pamaksan pura. Sang nahur sasangi nyukserahang daging cumek saprabheyaning pangodal ring pamaksan pura.
 - ca. Yan wenten sinalih tunggil nahur sasangi maturan swaran tangguran salwiring tatabuhan, sasolahan, minakadi salwir ipun, munggwing prabheya punika sami kaangganin antuk sang masasangi.
- (2) Haturan :

Yan wenten sang sapasira hugi ngaturang jinah, mwang sarupaning barang, punika sami patut kahunadikayang antuk prajuru desa, kelihan pamaksan pura sowang-sowang, mangda kasidhan mapwara hayu, haturan punika kaungguhang sajroning lekita.
- (3) Sasarin Canang :

Sasampun puput pangaci-acu puja waline, sasarin canang punika kapupulang saha kawilangin antuk prajuru desa, pamangku desa, indik tatiwak kalih pamargin ipun sangkaning jati nirmala.

Palet 2

Indik Resi Yadnya

Pawos 39

- (1) Krama desa Sengkidu yogya ngawrediyang kapradnyanan, kauttaman Sang Hyang Aji, asewaka nunas pawarah ring sang maraga widagdha pradnyan, pingajeng ring sang kasinanggeh guru loka.
- (2) Prajuru desa, kelihan banjar, kelihan pahuman minakadi kelihan tempek ngutsahayang kawrediyen kamuruban kauttaman Sang Hyang Aji, ngawentenang pasamuhan-pasamuhan, parembungan, pinaka genah krama desa mamangguhang pawarah-warah hayu.
- (3) Kalaning dewasa hayu, wenang desa matirta yatra, wenang desa ngaturang punya miyah resi bhojana ring Ida sang maangga sulinggih, taler kalaning karya utama ring desa, salwiring karya sane kaputus antuk Ida sang maangga sulinggih patut ngaturang punya. Asapunika taler ring sang mapitulung patut maweh dana.
- (4) Sang sapasira hugi krama desa pakraman Sengkidu yan mapakayun pacang matelah-telah, mawinten, mapodgala, taler mangda wenten pasadok pamihuning ring prajuru desa, sajaba patut polih palugrahan saking guru wisesa.
- (5) Prajuru desa pakraman Sengkidu mamatut pisan, yan krama desane mapunya ring sang pradnyan, ring sang widagdha, ring sang satata ngarajegang dharma, pingajeng ring Ida sang maangga sulinggih pasuryan dane sowang-sowang.

Palet 3

Indik Pitra Yadnya

Pawos 40

- (1) Pamargi ngupakara sawa, hugi manut linging sastra agama Hindu. Wenten akudang-kudang soroh, sakadi hinucap ring sor puniki :
 - ha. Mapendem ring prathiwi.
 - na. Makingsan ring ghni.
 - ca. Atiwa-tiwa uthawi palebon uthawi ngaben.
 - ra. Yan rare durung makupak untu, wus kepus odel hantaka, wenang nganggen pangentas bangbang masadhana klungah kelapa gading, ngaran ngalungah, tan wenang tiniwaken.
 - ka. Yan rare durung kepus odel hantaka, pamali ngaran, pendem juga tan hana pangupakaranya kewala ganten uthawi adem paican Ida sang maangga sulinggih.
- (2) Sang sapasira hugi krama desa Sengkidu tan kawasa makta sawa ka desa pakraman, yan sawa ika sampun keni pangupakara sawa. Yan wenten mamurug, yogya katiwakan danda, mrayascita, marisudha desa.

- (3) Salwiring upacara atiwa-tiwa, palebon, ngaben, ring setra hugi kawenangannya, tan wenang ring desa pakraman, sajaba malebonang puspan Ida sang sulinggih. Yan wenten mamurug, wenang danda marisudha desa, krama desa, sang atatulung danda gung arta manut pamutus pararem desa.
- (4) Yan wenten krama desa ngurung sawa, macamana, mabresih, kawenangannya tan kalugra lintangan ring petang dasa kalih dina ngawit dina sedane. Yogyo murnama, tilem miyah salwiring upacara rarahinan. Yan kalaning angurung sawa, sajroning desa pakraman Sengkidu, kawanganang karya agung kantos nyuci gening, lwire matabuh gentuh, Bhatara turun kabeh, karya agung ring Besakih, yogyo tumpang salune tedunang saking balene, genahang ring natah umahe, saking Bhatara kodhal kantos Ida masineb.
- (5) Tan wenang nyekeh sawa yan tan macamana, mabresih lintangan ring roras dina ngawit saking dinane seda. Yan wenten mamurug, danda gung arta manut pamutus pararem desa saha mrayascita desa.
- (6) Yening ngraksa sawa uthawi layon lintangan ring kalih rahina, layon punika patut katureksain mangda nenten maambu kawon.
- (7) Sang sapasira hugi wenang nginepang minakadi ngawangdeyang bangbang ring setra desa pakraman Sengkidu, yan wenten mamurug kadanda manut pamutus pararem desa, bangbang hinucap patut kahurug saha maweweh panyangaskara.
- (8) Sang sapasira hugi krama desa pakraman Sengkidu tan wenang atitiwa rikalaning pangaci-aci desa, lwire : patirtan, patotoyan ring pura kahyangan desa, ring pura Penataran, ring pura Paibon, Bhatara turun kabeh, tabuh gentuh, minakadi karya agung sawosan. Yan wenten mamurug, danda mrayascita desa, minakadi krama desa sane matulung danda gung arta manut pamutus pararem desa.
- (9) Yan makingsan ring ghni, sawa gineseng, hasti hinanyut, manut krama. Yogyo nganggen tirta pabersihan. Munggwing dewasa, sa sor ipun dewasane dados marginin mendem sawa.
- (10) Yan wenten krama mendem sawa kalaning dina larangan, kawasa, nanging hugi masawen, durung masusun bintak, tur mangda mabungbungin laku kinsan ngaran.
- (11) Indik padewasan :
- ha. Padewasan mendem ring prathiwi, makingsan ring ghni, wenang katiwakang antuk kelihan desa wyadin pamangku Dalem manut pasobhaya.
- na. Padewasan atiwa-tiwa, katiwakang antuk Ida sang maangga sulinggih sane pacang muput, yogyo sampun kapatut antuk prajuru desa.

- ca. Indik larangan ngupakara sawa, sajaba ngunggahang ka tumpang salu, sane kamanggehang sajroning desa pakraman Sengkidu, Iwire : Budha Pon, Budha Wage, Budha Kliwon, Saniscara Kliwon, Anggara Kliwon, Redite Umanis, Sukra Pon, Saniscara Wage, Redite Kliwon, ika semut sedulur miyah yan panca wara sareng sapta wara urip ipun 13 miyah 14, Sukra Kliwon, Saniscara Umanis, Redite Pahing, ika kala gotongan, miyah ring tanggal panglong ping 15, tanggal panglong ping 14, miyah tanggal panglong ping 1. Yan wenten mamurug, wenang danda gung arta manut pamutus pararem desa, saha mrayascita desa.
 - ra. Tan wenang ngagah ngulung, teges ipun, sajroning setra tunggil, tan dados mresihin sawa, nuju dina pangutangan yan ring setra punika wenten ngalaksanayang pangabenan. Yan wenten mamurug danda gung arta manut pamutus pararem desa, saha mrayascita desa.
 - ka. Tan wenang ngutang ngirim, teges ipun, sajroning setra tunggil, yan wenten ngirim, tan dados sane sawosan mendem sawa, minakadi atiwa-tiwa, ngaben ring dina punika. Yan wenten mamurug danda gung arta manut pamutus pararem desa, saha mrayascita desa.
 - da. Yan wenten mendem sawa uthawi makingsan ring ghni langkungan ring asiki sajroning setra Sengkidu, yogyo pamargine ka setra sinarengan katuntun antuk prajuru desa.
 - ta. Yan mresihin sawa hanyar sane pacang kaabenang kengin kamargyang ring karang pomahan krama hinucap.
 - sa. Mresihin sawa sane sampun nahen mapendem ring prathiwi uthawi nyawa kresihan ring setra Sengkidu mangda kalaksanayang ring pondok ring tulaktanggul.
 - wa. Tan kalugra ngulapin nemonin rahina pasah, purnama, tilem, kajeng kliwon muwah rarahinan jagat.
- (12) Yan wenten krama tamyu sane magama Hindu pacang ngamargyang upacara atiwa-tiwa ring setra desa pakraman, yogyo matur supeksa ring prajuru desa, yan sampun polih palugrahan patut nawur pangrisak setra manut pamutus pararem desa.
- (13) Rikala wenten ngalaksanayang pangabenan ring setra Sengkidu, yan wenten krama pacang ngeseng sawa, mendem sawa, sajroning rahina punika taler kalugra nanging mangda sinarengan.
- (14) Pangembak sasih ngaben ring sasih Karo, tan kalugra ngaben ring sasih Katiga, Kapat lan Kalima sane kasinanggeh sasih miyik. Yan wenten mamurug keni pamidanda mrayascita desa lan kahyangan.

- (15) Yan wenten sawa tan kaparihangken ring wawengkon desa pakraman Sengkidu, ingaranan babedag desa, yogya prajuru desa nguduuhang krama desa mendem ring setra pangilang-ilangan uthawi setra teben, sasampun polih lugraha saking sang amawa rat. Kicen bubuh pirata saking desa.
- (16) Yan sawa sangkaning salah pati, angulah pati, mati kapangawan, minakadi salwir ipun, desa tan ngalarangin, yan sawa punika tiniwaken pramangkin. Sara ledang sang madruwe, minakadi Ida sang maangga sulinggih sane pacang muput.
- (17) Yan wenten anak istri ngadut manik seda uthawi lampus, wenang kapendem uthawi kageseng, nanging garbhanya katetehin antuk watu, saha maniknya kagentosin antuk klungah nyuh gading tur kaupacarain kadi patute.
- (18) Yan wenten sinalih tunggil sawa, genahe seda wyadin padem sajabaning karang pomahan, lwire : ring tegal, pura, pasar, banjar, sekolah minakadi genah sawosan dudu karang pomahan, yogya sang madruwe wirange mrayascita marisudha genah punika. Yan sawa tan kaparihangkenan, genah punika patut kaparisudha kaprayascita antuk sang madruwe hemponan.
- (19) Indik panyanggra ritatkalaning ngalaksanayang upacara pitra yadnya, pamargin ipun kaungguhang sajroning paswara, pasobhaya banjar, pahuman, tempek, dadya nganutin dresta sowang-sowang.

Pawos 41

Indik angatma wedhana :

- (1) Sang sapasira hugi krama desa Sengkidu, yan kalaning angatma wedhana, lwire : ngaroras, patileman, baligya, tan wenang ngawangunang payadnyan, petak ring palemahan pura kahyangan desa, minakadi kahyangan sawosan.
- (2) Sang sapasira hugi wus ngawangun karya angatma wedhana, yogya karang payadnyan ika kapralina, sakasep ipun petang dasa kalih dina saking dina karyane.

Palet 4

Indik Manusa Yadnya

Palet 42

- (1) Sang sapasira hugi krama desa Sengkidu, ngawangunang salwiring upacara manusia yadnya, tan wenang magenah ring wawidangan palemahan kahyangan panyiwian desa. Yan wenten sinalih tunggil mamurug, wenang danda gung arta manut pamutus pararem desa, saha mrayascita marisudha pura punika.

- (2) Sane kalugra mawinten magenah ring pura sinalih tunggil, sang sapasira hugi krama desa sane pacang kahadegang dados pamangku ring pura kahyangan inucap. Taler sane kahadegang pinaka prajuru desa, wenang mawinten, majaya-jaya ring pura desa uthawi Bale Agung Sengkidu minakadi pura Pamaksan Mendira.
- (3) Indik manusa yadnya sane dados kamargyang sajroning desa pakraman Sengkidu hugi sane nganutin dresta kuna minakadi sastra agama.

Palet 5

Indik Butha Yadnya

Pawos 43

- (1) Sajroning desa pakraman Sengkidu, pacaruan manut hunggwan, kalih sor singgih, lwire:
 - ha. Pacaruan desa sane kawangunang sadakala, manut gagaduhan pura, banjar, pahuman, minakadi tempek sowang-sowang.
 - na. Pacaruan desa padgatakala, rikala jagate kabrebehan, kageringan, kadurmanggalan, katiben panca bhaya miyah sane sawosan sane patut carunin.
 - ra. Agung alit caru, manut hunggwan acaru, babuwatan pacaruan kalih nista, madya, uttamaning caru.
- (2) Pacaruan ring pura-pura kahyangan, dadya, salwire, manut drestan pura sowang, minakadi awig-awig gagaduhan pura hinucap.
- (3) Yan sinalih tunggil pura kahyangan, salwire reneng pacarone kantos tigang plabuh, wenang prajuru desa mamawosin. Yan wus puput babawose, yogya maguru piduka, ngawit masasapuh mangda kasidhan ngaturang pangaci-aci.
- (4) Caru balik sumpah kalaning tilem kasanga, ring pempatan desa, manut sastra dresta, kalanturang antuk brata panyepian.
- (5) Rikalaning ngalaksanayang brata panyepian, krama ngamargyang ring jro sowang-sowang, prade wenten kapanca bhaya uthawi kabuwatan patut digelis matur supeksa ring prajuru desa minakadi pacalang desa.
- (6) Upacara panyepian nganutin catur brata kadi ring sor :
 - ha. Amati Ghni, tan kengin maapi-api sajawaning :
 - na. Amati Karya, tan kengin nyambut karya.
 - ca. Amati Lalanguwan, tan kengin **maoneng-onengan**, maswara ghora lan **sapanunggilan ipun**.
 - da. Amati Lalungayan, tan kengin **malalungayan**, **sajawaning sang polih palugrahan saking prajuru desa**.

- (7) Pabratan hinucap kamargyang saking semeng ngantos semeng benjangne, matengeran antuk swaran kulkul, yan wenten mamurug keni pamidanda manut pararem desa.
- (8) Ri wus rahina nyepi, benjangne kawastanin pangembak ghni, patut sowang-sowang krama sami ngaksama ring kadangnya uthawi ngawentenang dharma santhi.

SAT SARGGAH

SUKRETTA TATA PAWONGAN

Palet 1

Indik Rangkat

Pawos 44

- (1) Indik rangkat punika, manut desa kala patra, mwang sima dresta, sane kapatutang tur katinutin antuk krama desa sowang-sowang, tan singsal ring uger-uger panagara, Iwire:
 - ha. Papadikan.
 - na. Marangkat uthawi ngarorod.
- (2) Pidabdab sang marangkat patut :
 - ha. Manut kecaping agama Hindu.
 - na. Nganutin yusa sakirangnya risampun macihna munggah deha truna, nenten singsal ring huger-huger nagara.
 - ca. Prade pacang ngarangkatang siyos agama, patut ngamargyang upacara sudhi wadhani sasampun wenten lekita saking sang amawa rat.
- (3) Munggwing tata cara rangkat minakadi pawiwahan kaungguhang sajroning pararem desa.
- (4) Sajroning desa pakraman Sengkidu, indik rangkat punika yan sampun mawidhi widhana pawiwahan, tur malukat kasaksinin antuk tri upasaksi, manusa saksi, butha saksi, miyah dewa saksi, miyah ngaturang pajatyan ring pura Bale Agung uthawi pura Pamaksan Mendira kasaksinin antuk prajuru desa, rangkat punika kasinanggeh puput palikrama.
- (5) Yan wenten anak istri krama desa pakraman Sengkidu, karangkatang antuk sang sapasira hugi, napi malih antuk anak saking dura desa, yan kantos arahina ring awengi saking dina matinggale saking jumah tan wenten pajati, yogya sang madruwe wirange nunas kanti ring prajuru desa Sengkidu mangda ngamargiyang saserepan. Yan sampun sinah genahnya, ngararis ngamargiyang panegdeg.
- (6) Sang sapasira hugi krama desa Sengkidu, yan karawuhan tamyu praye masinutan malarapan antuk ngarorod, hugi mangda masadok mihuningang ring prajuru desa, prajuru desa yogya maritetes, yan sangkaning tan patut pamargi rangkatnya, prajuru

desa nguduhang mangda katur ring sang amawa rat. Yan wenten krama desa mamurug, yogya sang mamurug danda gung arta manut pamutus pararem desa.

Pawos 45

- (1) Pade wenten anak lanang mobotin anak istri sane sami-sami durung madruwe rabi, tur sabda kapariangken, prajuru patut ngutsahayang sang kalih majangkepan, tur kaupacarayang sakadi patut olih sang lanang.
- (2) Prade sinalih tunggil tan tinut karangkatang, kadanda gung arta manut pamutus pararem desa, saha wicaranya katur ring sang amawa rat.
- (3) Yan sinalih tunggil sampun madruwe rabi, wicaranya katur ring sang amawa rat olih wirangnya, prade mamurug kadanda gung arta manut pamutus pararem desa.
- (4) Yan wenten anak istri bobot nenten wenten ngangkenin, patut :
 - ha. Sang kadalih mobotin tan pariangken, miyah sang bobot madruwe saksi, patut kamargiyang pamrascita ring wawidangan desa pakraman Sengkidu, munggwing prabeya sami kaangganin antuk sang kalih.
 - na. Prade wenten anak siyasan ring sang kadalih mariangken mobotin, wenang sang mariangken punika sareng madewa saksi tur sasampune puput padewasaksine sang bobot, sang kadalih miyah sang mariangken sareng mobotin, mrayascita desa, sasampun punika bobotan anake istri kaupacarayang masrana antuk keris.
 - ca. Prade sang patut madewa saksi tan satinut ngamargiyang padewasaksian, sang bobot uthawi wirangnya patut ngaturang wicara punika ring sang amawa rat, saha sang patut madewa saksi tan satinut ngamargiyang dewa saksi kadanda manut pamutus pararem desa.
- (5) Yan wenten sinalih tunggil krama desa Sengkidu ngamet anak istri antuk mlagandang, mamendet, marikosa, miyah salwir ipun sane tan nganutin tata krama, tan yogya pinuput widhi widhana pawiwahannya sadurung wenten pamutus saking guru wisesa.
- (6) Yan wenten sinalih tunggil saking dura desa, pacang muput rangkat ka wawengkon desa pakraman Sengkidu, sang madruwe wirang luh yogya nunas pasaksi ring prajuru desa Sengkidu masarana antuk canang pangrawos, sinalih tunggil mangda wenten ngarawuhin.
- (7) Yan wenten anak istri saking desa Sengkidu marangkat ka dura desa, ritatkala mapuputan maserah ka umah wirange istri, patut keni punya gung arta manut pamutus pararem desa.

- (8) Yan anak istri saking desa pakraman Sengkidu marangkat, ngarorod sareng anak lanang wadesa Sengkidu, ritatkala pacang mapuputan maserah ka umah wirange istri patut keni punya gung arta manut pamutus pararem desa.
- (9) Yan wenten sinalih tunggil krama desa Sengkidu ngamet anak istri pinaka rabi tan manut sima dresta, minakadi sastra agama, yogya katur ring sang amawa rat mangda kabawosan saha polih pamutus.

Palet 2

Indik Belas Makuren uthawi Nyapyan

Pawos 46

- (1) Sane kabawos nyapyan, pinaka sang palas marabi, palas makurenan, mawiwit wicara macihna tan tumus suka citaning panunggalan idhep sang alaki rabi sane sampun katiwakan pamutus antuk guru wisesa saha kadamyakang ring sangkepan desa Sengkidu.
- (2) Tata cara palas marabi :
 - ha. Yan wenten krama desa sinalih tunggil mapikayun pacang palas marabyan patut matur supeksa ring prajuru, prajuru maritetes, kaicen tatimbang mangda prasidha satata hadung marabi.
 - na. Sang sapasira hugi madruwe oka istri sampun marabyan, prade mantuk sangkaning ngambul, sajroning tigang sasih uthawi 105 dina saking dina ngambule patut matur supeksa ring prajuru desa, oih prajuru desa wicaranya kabawosin, tur kicen tatimbang mangda satata hadung malih.
 - ca. Yan tatimbang prajuru desa tan katinutin, wicaranya dados kalanturang ring sang amawa rat, prade pamutus sang amawa rat pateh kadi tatimbang prajuru desane, sang mawicara kadanda manut pamutus pararem desa.
- (3) Yan wenten sinalih tunggil krama desa ngarangkatang sapiyan, sadurung tigang sasih uthawi 105 dina saking dina palase, yogya sang ngarangkatang sapyan punika keni danda pakerang gung arta manut pamutus pararem desa.
- (4) Krama desa sane belas marabi uthawi makurenan, sasampun polih pamutus saking guru wisesa, patut masadok mihuningang ring kelihan banjar, mangda kadamyakang ring banjar, ring desa, sakasep ipun asasih saking palase.
- (5) Yan wenten anak istri wit saking wawengkon desa pakraman Sengkidu, nyapyan ring dura desa, mawali ka desanya, yogya sang madruwe wirang matur supeksa ring prajuru desa, saha mrayascita marisudha anake luh punika. Yan tan kaparisudha antuk wirangnya, patut marisudha raga, mangda kasinanggeh nirmala.

Palet 3

Indik Balu

Pawos 47

- (1) Sane kabawos balu, anak istri katinggal seda antuk rabine, yan anak lanang seda rabine wyadin katinggal nyapyan taler kawastanin balu.
- (2) Yan wenten lanang balu, keni paayah-ayah, urunan miwah papeson.
- (3) Yan anak istri balu, luput paayah-ayah, urunan miwah papeson.
- (4) Krama balu lanang sane madruwe oka istri, balu istri sane madrwe oka lanang, sampaun hantes maayahan manut panglokika prajuru desa, patut maayahan bulangkep, matata turun cumek, bulangkep antuk pyanak.
- (5) Yan wenten sinalih tunggil anak istri balu, marangkat, yogya rangkat punika kapuputang antuk wirang lakine rihin, yan babalon punika kari pageh.
- (6) Munggwing wawenangan babalon luh uthawi rangda, ring indik wawarisan, minakadi sane sawos-sawosan, Iwire :
 - ha. Myara lan muponin wawarisan sakantun pageh magenah ring rabine.
 - na. Tan dados ngadol, ngadeang uthawi makidihang wawarisan ring sang sapasira hugi, sadurung polih palugrahan saking waris kapurusa.
 - ca. Prade balu sane pageh nganutin swadharmanya, rarisi katundung olih waris rabine, balu hinucap patut matur supeksa ring prajuru, prajuru patut mamawosin, ngicen tatimbang, yan tatimbang prajuru tan katinutin sinalih tunggil dados kalanturang wicaranya ring sang amawa rat, prade pamutus sang amawa rat pateh ring tatimbang prajuru desane, sang ngaturang wicara ring sang amawa rat keni danda manut pamutus pararem desa.

Palet 4

Indik Santana

Pawos 48

- (1) Sajroning desa pakraman Sengkidu, ngarajegang pidabdab santana kapurusa sidhikara tunggal, paperasan tunggal dadya.
- (2) Prade pawiwanan tan ngawentenang santana, kengin ngedih santana antuk upasaksi sakala niskala sane kawastanin santana paperasan.
- (3) Yan wenten pakurenan tanpa widhi widhana ngawetuung santana, mangda santana punika tan kawastanin babinjat uthawi astra, yogya santana punika kakukuhin antuk upacara paperasan.

- (4) Sang sapasira hugi krama desa meras santana, kasinanggeh sampun puput palikrama, yogya sangkaning radin, mawidhi widhana paperasan, kasaksinin antuk prajuru desa saha kasyarang ring paruman, tur sampun wenten lekita pamikukuh saking sang amawa rat.
- (5) Sane dados kaperas kaanggen santana kadi ring sor puniki :
 - ha. Anak sane magama Hindu.
 - na. Paprenahan nedunang saking waris kapurusa, tunggal dadya, tunggal sidhikara.
- (6) Indik meras santana, sasampun puput upacaranya manut sastra agama Hindu, kalanturang ngarereh lekita ring guru wisesa.
- (7) Munggwing tata cara meras santana mungguh sajroning paswaran desa.

Palet 5

Indik Wawarisan

Pawos 49

- (1) Lwire sane wenang kawarisin :
 - ha. Hamong-hamongan ring desa, ayah-ayahan sahurah-arih.
 - na. Hutang piutang sang ngawarisang.
 - ca. Saraja druwe, bhrana, tegal, tatamyan, sakancan kasugihan.
- (2) Sane wenang ngawarisin :
 - ha. Manut lalintih paprenahan adoh tampek saking purusa tunggal sidhikara, tunggal dadya.
 - na. Putra dadaman wyadin putra paperasan.
 - ca. Sangkaning pitemes saking sang kawarisin, sang madruwe salwir sane dados kawarisang, saking palugrahan guru wisesa, pinih akeh apahtigayan saking padruwennyane maka piolih-olih pagunakayan.
- (3) Swadharmaning sang patut ngawarisin :
 - ha. Nerima saha ngutsahayang tatamyan pahan saking keluhurannya, minakadi ngempon sanggah, pura dadya saha pangupakarannya muwah nyeledinin ayah-ayahan pawaris.
 - na. Ngabenang pawaris saha upacara-upacara salanturnyane.
 - ca. Nawurin hutang-hutang pawaris.
- (4) Sang sapasira hugi krama desa Sengkidu, yan tilar saking agama Hindu, tan yogya ngawaris sane kamulan patut warisin.
- (5) Ngedum wawarisan, kapatut sasampun puput maabenang sang ngawarisang bhrana kalih kasugihan punika. Sane dados dum, sajaba sane mangge padagingan pangaci-aci,

minakadi salwiring sane mangge piranti ngalaksanayang upacara agama, pustaka-pustaka sane kapingitang salwir ipun.

- (6) Pahpahan wawarisan kadi ring sor :
 - ha. Sane lanang polih ategen.
 - na. Sane istri polih asuhun, hamung muponin kewanten.
- (7) Sang kengin mapaweweh rikala kantun mahurip ring oka sane pacang kesah marabyan, marupa pitemes sane dados kawarisang pinih akeh apahtigayan saking padruwennyane maka piolah-olah pagunakaya.

SAPTAMAS SARGGAH

WICARA LAN PAMIDANDA

Palet 1

Indik Wicara

Pawos 50

- (1) Salwiring wicara indik pakraman ring wawidangan desa pakraman Sengkidu, wenang rinawosan antuk prajuru desa. Yan tan kasidhan puput, prajuru desa ngaturang ring guru wisesa buwat matatimbang.
- (2) Yan wenten wicara indik pakraman ring banjar, pahuman, tempek, pamaksan, subak, minakadi sekaa-sekaa sawosan, yoga kabawosan antuk prajurunya sowang-sowang, yan tan kasidhan puput, wenang katengahang ke desa, prajuru desa wenang mamawosin.
- (3) Indik nepasin wicara hinucap, tan maren ngupadi dharma kawelasasihan, tur malarapan antuk lekita, bukti, saksi saha tan maren mangda nepek ring sadaging awig-awig, paswara lan pamutus pararem desa.
- (4) Yan pamutus wicara sane katiwakang antuk prajuru desa Sengkidu tan katinutin uthawi tan kahiring antuk sang mawicara, wenang sang mawicara nunasang pangrawos ring sang patut mamawosin, ring guru wisesa.
- (5) Yan sang mawicara tan tinut ring pamutus wicara sane katiwakang hinucap ring hajeng, prasidha sang mawicara tan kalugra ngangge sapadruweyan desa Sengkidu, dosane mamandal ring desa.

Palet 2

Indik Pamidanda

Pawos 51

- (1) Lwiring pamidanda sane wenang katiwakang antuk prajuru desa, banjar pakraman, pahuman, tempek, subak, sekaa-secaa sawawengkon desa pakraman Sengkidu, sakadi ring sor puniki :
 - ha. Danda arta
 - na. Upasaksi, dewa saksi, pangrarata, sumpah.
 - ca. Danda panyangaskara, lwire : mrayascita, marisudha, miwah salwir ipun.
 - ra. Kasepekang saha kaheladang.
 - ra. Pamidanda sawosan manut palugrahan guru wisesa.
- (2) Patiwak pamidanda, manut unggwan wicarane sowang-sowang, minakadi werat ringan wicara hinucap, lwire :
 - ha. Yan wicara ring desa pakraman, yogya kapidanda antuk desa. Munggwing dadandan mantuk ka desa.
 - na. Yan wicara ring banjar pakraman, yogya kapidanda ring banjar ika, dadandan mantuk ka banjar.
 - ca. Yan ring pahuman, tempek, subak, sekaa-secaa, katiwakin pamidanda ring kuwu tempekanya sowang-sowang, munggwing dadandan mantuk ka jroning kuwu tempekanya
- (3) Agung alit dadandan, manut panglokikan agung alit werat ringan kasisipane sane munggah ring awig-awig gagaduhanya sowang, minakadi paswara pinaka pamutus sangkepan wyadin paruman.

Pawos 52

- (1) Rikala pawanengan nawur dadosan, dadandan lan sapanunggilannya ring desa, yening celed patut kapinggelang uthawi katikelang.
- (2) Risampun keni danda nikel mawaneng malih tigang sasih tan katawur, wenang sang keni danda nyukserahang kantah sane sawawa pangargan ipun ring ageng dadandane.
- (3) Yan kantos langkung ring pitung rahina saking nyukserahang barang kantah punika nenten katebas, wenang kalelang saduhajeng antuk krama desane. Yan panumbas punika lintangan ring dadandane, lintang ipun katerimayang ring sang madruwe, yan panumbas barang punika kirang ring dadandane, sang keni danda patut malih ngawewehin mangda tegep.
- (4) Prade sang keni danda tan suka, tan mresidayang nyukserahang barang pinaka kantah, prasida kabawos tan nganutin awig-awig desa, hawanian kasepekang saking desa.

ASTAMAS SARGGAH

NGUWAH-NGUWUHIN AWIG-AWIG

Pawos 53

- (1) Sane wenang uwahin inggih punika, pasukrettan, pamutus pararem, paswaran desa miyah sane sawosan sapanunggilan ipun.
- (2) Sane wenang uwuhin inggih punika, pasukrettan, paswara, pamutus pararem wyadin pamutus paruman miyah sane sawosan sapanunggilan ipun.
- (3) Indik nguwahin kalih nguwuhin pasukrettan, paswara, pamutus pararem wyadin pamutus pasamuhan miyah sane sawosan, manut tata kramaning paruman.
- (4) Indik nguwahin kalih nguwuhin awig-awig, manut tata kramaning pasamuhan sasampun nunas tatimbang ring guru wisesa kalih polih palugrahan sang amawa bhumi.

NAWAMAS SARGGAH

PAMUPUT

Pawos 54

- (1) Awig-awig puniki mawasta Awig-awig Desa Pakraman Sengkidu.
- (2) Awig-awig puniki pinaka bantang sahananing awig-awig, paswara, pasukrettan, miyah salwir ipun, sane manggen ring banjar pakraman, pahuman, tempek, subak, sekaa-sekaa sane wenten sajroning desa pakraman Sengkidu.
- (3) Banjar, pahuman, tempek, kahyangan, pamaksan, subak, sekaa-sekaa sane wenten sajroning desa pakraman Sengkidu, wenang ngawangunang awig-awig, pasukrettan, paswara, gagaduhan sowang-sowang, nanging daging ipun tan yogyo singsal tungkas ring awig-awig desa pakraman Sengkidu.
- (4) Salwiring sane durung mungguh ring awig-awig puniki, kaungguhang sajroning paswara, pamutus parumah desa pakraman Sengkidu.
- (5) Dresta kuna sane kari dados angge, yan tan tungkas ring daging awig-awig desa pakraman Sengkidu, manut kojaring sastra agama Hindu, hanut ring uger-uger nagara, saha kaputusang sajroning paruman desa pakraman Sengkidu.
- (6) Awig-awig desa pakraman Sengkidu, pawangun krama desa pakraman Sengkidu, kapastika manut upacara manut agama Hindu, kala dina : Coma Umanis, Uku Medangkungan, sasih Katiga, tanggal ping 15, rah 9, tenggek 2, isaka 1929, magenah ring Pura Puseh Sengkidu, kapuput antuk Ida Pedanda Gde Wayan Pasuruhan, saking griya Kawan Sibetan.

- (7) Awig-awig puniki kalinggatanganin antuk prajuru desa, Iwire : kelihan desa, patajuh kelihan desa, panyarikan, juru raksa, patangan desa saha kasarengin antuk kelihan banjar pakraman, kelihan pahuman, kelihan tempek, kasaksinin antuk Kelihan Banjar Dinas Subagan, Karangasem lan Mendira, Perbekel Persiapan Sengkidu, Camat Manggis, kakukuhang antuk Bupati Karangasem.
- (8) Awig-awig puniki kalaksanayang ngawit dina pamaspas hinucap ring hajeng kantos salantur ipun.

Swig-awig Desa Pakraman Pengkudu, Manggis, 74.

(9) Luwir sang ngalinggatanganin :

ha. Prajuru Déśa



Pañarikan,

I Wayan Mastra, S.Pd.

Patajuh Kelihan Déśa,

I Ketut Lipet Widianara, S.Ag.

Pañarikan,

Drs. I Noman Kardi

Juru Rakṣa,

I Ketut Sudira, S.Pd.

Juru Rākṣa,

I Nengah Mardana

Patangan Déśa sané
ngamongin parhyangan

I Ketut Sudira, S.Pd.

Patangan Déśa sané
ngamongin parhyangan

I Gede Sudarta

Patangan Déśa sané
ngamongin parhyangan


Jro Mangku Wayan Sumiarna

Patangan Déśa sané
ngamongin pawongan

I Wayan Suardhita

Awig-awig Desa Pakraman Pengkudu, Manggis, 75.


Patangan Désa sané
ngamongin pawongan


I Nengah Widia

Patangan Désa sané
ngamongin palémahan


I Ketut Sulastra

Patangan Désa sané
ngamongin palémahan


I Wayan Murja


Undagi Désa,


I Wayan Mudra

Kélihan Pacalang,


I Nengah Suarjana


Kélihan Sékéha Gong,


I Nengah Suparma

Patangan Désa sané
ngamongin pawongan


I Nengah Sutresna

Patangan Désa sané
ngamongin palémahan


I Nengah Suja


Undagi Désa


I Nengah Suarna


Kélihan Pamangku,

Jro Mangku Madé Simpén

Kélihan Sékéha Gong,


I Nengah Budiasa

Kélihan Sékéha Téruña,


I Gedé Sumarpa

Awig-awig Desa Pakraman Sengkudu, Manggis, 76.

Kélihan Sěkěha Těruna,

Ni Putu Aryantini

Kélihan Bañjar Pakraman Subagan,



Ira Mangku Madé Riyem

Kélihan Banjar Pakraman

Karangasém,



Drs. I Ñoman Kardi

Kélihan Bañjar Pakraman

Mendira,



Drs. I Kétut Surita

Kélihan Pahuman Luput,

I Wayan Karşa

Kélihan Pahuman Luput,

I Nengah Darti

Kélihan Pahuman Darmadi,

I Komang Darpa

Kélihan Pahuman Darmadi,

I Nengah Sumantra

Kélihan Pahuman Ginadi,

I Ñoman Rinthia, S.Pd.

Kélihan Pahuman Ginadi,

Awig-awig Desa Pakraman Pengkudu, Manggis, 77.

Kělihan Pahuman

I Něngah Běndéša,




I Noman Djirna, S.Pd.




Kělihan Pahuman

I Něngah Běndéša,



I Ketut Suarta

Kělihan Pahuman Badung,




I Wayan Nariasna

Kělihan Pahuman Badung,



I Něngah Puja



Kělihan Pahuman Darya,



I Noman Darma



Kělihan Pahuman Darya,



I Wayan Sukerti

Kělihan Témpék Kangin,



I Něngah Suwirta

Kělihan Témpék Kélod,



I Noman Radeg

Kělihan Témpék Kauh,



I Něngah Sukartika

na. Maka Saksi

Kělihan Bañjar Dinas Subagan,



I Wayan Suardhita

Awig-awig Desa Pakraman Sengkidu, Manggis, 78.



Kelihan Banjar Dinas Karangasem,

I Ketut Sulastra

Kelihan Bañjar Dinas Mendira,

I Wayan Warsa



Perbeker Désa Persiapan

Sengkidu,

I Wayan Darpi, SH.

Camat Manggis,


I Wayan Purna, S.Sos.



ca. Kalékitayang ring Kantor Bupati Karangasem,

duk rahina *Soma, Elmanis* Tanggal Maséhi *29 Agustus 2007*.

Reg. Nomor : *03 / VII / 2007*.



I WAYAN GEREDEG